

Rau To Paulus Imbooda Ila To Yes Korin Muun

1 Korin—1 Corinthians

¹⁻² You Paulus. Maaron ipoi ghou nanim le, ve ighur ghou nanim mbanjoona to Yesu Krisi itaghon tau lolo. Yeru tonvetaz toit Sostenes nimbood rau tonene ilat to yam to aneep ila lupuun to Maaron izi ndug Korin. Yam aneep tunja ila to Yesu Krisi, tauto anim tamtoghon toni patabuana wa. Ye ipoi gham anim le, leso ataghon ngar patabuan animale ye tau. Ve yam moghon maau. Ye igham tovene pa tamtoghon tisob to ndug ndug to tisunsun ila Tiina toit Yesu Krisi iza. Ye tiina todi, ve tiina toit paam. *1Kor 6:11; 2Tim 1:9*

³ Poia to Tamaan Maaron ve Tiina toit Yesu Krisi iza tiam, ve tingin gham aneep pool toman lolomim luuma. Onoon.

Paulus ipait Maaron pasa, ye ighur poia toni tiina iza to yes Korin

⁴ Sawa isob, you napait Maaron payam toman lolog poia. Pasa, ila uraat to Yesu Krisi, Maaron ighur poia toni tiina iza tiam.

⁵ Yam to aneep tunja ila to Krisi, Maaron Avuvu irei ngar popoia naol payam. Tauto aghazoon pa ngar popoia naol, ve avovotia Maaron aliña ila ataam naol. *1Kor 12:7+; 2Kor 8:7*

⁶ Maaron Avuvu igham uraat toman tapiri ila lolomim. Tauto aghilaal aghaze saveen to Krisi to nisavia payam, nene onoon, ve akisi ariana.

⁷ Tovenen aazne, ambool pa tapiri, ma ngar poia eta to Maaron Avuvu ireii pait ne maau. Ve asasaŋan aghaze le aghita sawa to Tiina toit Yesu Kriŋi imuul inim, ve Maaron ipatoŋa ivot ighazoonŋ.
Pil 3:20; 1Tes 1:10; Tit 2:13

⁸ Maaron tau pale ipalot gham, ve igham gham ayoon ariana le aza pa sawa to ye ighuri payam. Leso sawa to Tiina toit Yesu Kriŋi imuul inim, ye ighita gham ighaze lemim sosor eta maau.

⁹ Iit irau tanumeer Maaron. Pasa, ye itaghon saveeŋ toni irau sawa isob. Ve ipoi gham anim le ve yamŋa Natu Yesu Kriŋi alup gham anim ee moghon wa.
Pil 1:6; 1Tes 5:23+; 1Pe 5:10

Paulus isaav ariana pa yes Korin ighaze tivalag di malep

¹⁰ Yam tonŋvetaz, you naghaze napalot gham ila Tiina toit Yesu Kriŋi iza tovene: Avalag gham aneep lemim lemim malep. Yam asob alup lolomim ve ngar tiam inim ee moghon, ve azuaria gham pa taghoniinŋ ngar ee moghon. *Ro 12:16; Pil 1:27, 2:2; 1Pe 3:8*

¹¹ Yam tonŋvetaz, you nasavia saveeŋ tonene pasa, Kloe tamtothon toni pida tinim, ve tipaesia varumim payou tighaze parzoraanŋ naol tivotvot ila lolomim.

¹² Nene nasavia ngar tiam to avalag gham aneep lemim lemim, ve yam pida asavsav aghaze: “You nataghon Paulus,” ve pida aghaze: “You nataghon Apolos,” ve pida aghaze: “You nataghon Petrus,” ve yam pida aghaze: “You nataghon Kriŋi.” Ngar tonanan, yam asob aghamghami. *1Kor 3:4+*

¹³ Vena, yam aghaze arab motmotin Krisi anona inim suruvu suruvu? Ma aghaze you Paulus naghām inamim, ve tirab ghou izala ai pambaroon payam? Ma yam aghām ya ila you izag? Maau.

¹⁴ You lolog poia pa Maaron ve napaiti pasa, naghām ya pa yam ival maau. Naghām ya pa Krispus ve Gaius moghon. *Mbanj 18:8; Ro 16:23*

¹⁵ Tovenen tamtoḡhon eta irau isaav ighaze: “Yei tonene nighām ya ila Paulus iza,” ne maau.

¹⁶ O, ḡgaramus matag inḡal. You naghām ya pa Stepanas ve yes to tineep tomani ila ruum toni ne paam. Ve yam pida, lolog imaagh. Naghām ya payam, ma maau? *1Kor 16:15*

¹⁷ Pughu to you naghām ya pa yam ival maau, nene vene: Krisi imbaan ghou pa naghām ya pa tamtoḡhon maau. Ye imbaan ghou pa navotia varu poia. Ve ye ighaze sawa to navotia varu poia, you irau nasaav nanimale yes ḡgara to taan to tighamghām pa taudi izadi ne maau. Pasa ighaze naghām tovene, nene pale narab matin ai pambaroon to Krisi tapiri, ve tamtoḡhon tighita ai pambaroon toni inimale mbeb sorok. *1Kor 2:1+*

Mateen to Krisi izala ai pambaroon ipatoon ḡhiit ighaze Maaron ḡgar toni, nene ite kat pa ḡgar to iit tamtoḡhon

¹⁸ Onoon, saveen to isavia mateen to Krisi izala ai pambaroon, tamtoḡhon to titaghon ataam to tilaledi, tighita tighaze nene saveen to borouḡa. Eemoghon iit to Maaron ighamghām uraat pa ighām mulin ḡhiit ne, taghilaala taghaze saveen

tonowen, Maaron tapiri ineep ila. *Ro 1:16; 1Kor 2:14; 2Kor 4:3*

¹⁹ Saveeja, Maaron isavia ve timbooda pataghaan wa. Ighaze:

“Ndiran ngara to taan, you pale nawaghamun ngar todi le tiwaghamgham.

Yes to tighaze tighazoon kat pa ngar tintina, you pale naghham ngar todi inim mbeb sorok, ve le anoja maau.” *Is 29:14*

²⁰ Ighaze venen, pale tasaav vena pa yes ngara to taan, ve yes to ledi ngar tintina pa tutuun to Mose, ve yes to aazne tiwazoran di pa savsaveen ma ngar? Pale tapait di? Maau. Pasa, ngar to tamtoghon to taan tipakur taudi pani, nene Maaron ipatoonja ighaze nene ngar to borouja. *Lu 10:21; Ro 1:22; 1Kor 3:18*

²¹ Maaron ngar toni tiina, ve ighita ighaze poia pa ipoon ataam pa tamtoghon to taan, leso tipait taudi izadi sob. Tauto yes ngara to taan ngar todi irau iuul di pa tiwatag Maaron maau. Maaron ighaze igham mulin tamtoghon itaghon ataam ite. Nene saveen to Krisi to nivovotia. Onoon, tamtoghon to titaghon ngar to taan, tighita saveen tonene tighaze nene saveen to borouja. Eemoghon yes to tighur ila saveen tonene, Maaron pale igham mulin di. *Mt 11:25+*

²² Yes Yuda tizoorndug tighaze tighita mbeb gharatoonjadi tivot tinim ghilaloon padi, ghoro tighur ila. Ve yes Grika tizuarua di pa lonjaan saveen to yes ngara to taan to tighita tighaze le pughu tiina. *Yo 4:48; Mbanj 17:21*

²³ Eemoghon yei nivovotia saveen pa mateen to Krisi izala ai pambaroon. Saveen tonene, sawa to

yes Yuda tilooŋa, tirere pani ve tighur ila maau. Ve sawa to yes Grika tilooŋa, tivelegi tighaze nene saveeŋ to borouŋa. *Yo 6:60+; 1Kor 2:2,14*

²⁴ Eemoghon yes to Maaron ipoi di tinim le, yes Yuda ve Grika paam, yes tighilaal tighaze Krisi ipatoon Maaron tapiri ve ngar toni tiina ivot ighazoon pait. *Ro 1:16; Kol*

2:3

²⁵ Onoon, tamtoghon to titaghon ngar to taan, tiveleg Maaron ngar toni tighaze nene inimale ngar to borouŋa. Eemoghon maau. Ngarg toni tiina. Ilib kat pa ngar to iit tamtoghon. Ve uraat to Maaron ighami,*

tovene paam. Tamtoghon tivelegi inimale mbeb sorok, ve tighita tighaze le tapiri maau. Eemoghon uraat tonowen, tapiri tiina kat. Ilib pa iit tamtoghon tapiriid. *2Kor 13:4*

Ngarg to Maaron ene ite kat pa ngarg to taan

²⁶ Yam tonvetaz, agham ngarg pa taumim. Sawa to Maaron ipoi gham anim le, gabuamim ne vena? Ndiran to titaghon ngarg to taan, tighita tamtoghon tiam katindi tighaze ledi ngarg tiina maau. Ve tighaze yes ledi izadi ve tapiridi pa ghamuun mbeb eta maau, ve sinj todi paam, ledi izadi maau.

²⁷ Tovenen aghita. Yes to tamtoghon to taan tiveleg di tighaze ledi ngarg maau tinimale borouŋa, tauto Maaron igham di tinim le, leso ipamayanin ndiran ngara to taan. Ve yes to tamtoghon to taan tighita di tighaze tapiridi iraua maau, tauto

* **1:25:** Uraat to Paulus isavia, nene mateeŋ to Krisi ve mundigiin toni.

Maaron igham di tinim le, lesu ipamayanjin yes to tapiridi tintina. *Mt 11:25; Yems 2:5*

²⁸⁻²⁹ Ve yes to ledi izadi maau, ve tamtoghon to taan matadi velegin di, ve tighita di tinimale mbeb sorok, tauto Maaron igham di tinim le. Lesu ipatoon yes to izadi tintina ighaze izadi tonowen, mbeb sorok. Pasa, ye lolo pa tamtoghon eta ipait tau iza ila mata malep. *Ro 3:27; Ep 2:9*

³⁰ Maaron tau to igham gham aneep tunja ila to Yesu Krisi. Ye ighur Yesu Krisi pa ipaghazonan ghiit pa ngar toni, lesu taneep pooi. Ve Krisi to igham ghiit taneep denjaad ila Maaron mata, ve igham ghiit tanim tamtoghon toni patabuana, ve ipas ghiit tavot pa ngar samia tapiri, lesu tanim mbesoona pani muul sob. *Ro 3:24; 2Kor 5:21; Ep 1:7; Pil 3.9*

³¹ Tovenen tataghon saveen to timbooda pataghaan wa.

“Tamtoghon to lolo pa ngar to pakuruun, ye irau ipakur Ngeu Tiina pa ngar to ye ighami.”
Yer 9:23+; 2Kor 10:17

2

Paulus isavsaav inimale yes ngara to taan maau

¹ Yam tonvetaz, matamim ingal. Sawa to nalat ve navotia Maaron aliya payam, you nasavia saveen pughu ariana inimale yes ngara to taan to tinghamham pa taudi izadi ne maau. You nasavia saveen rauraua payam, lesu aghazon pa Maaron ngar toni. Ngar tonowen, muun iyoon, ve aazne ivot ighazon wa. *1Kor 1:17*

² Pasa, sawa to nalat ve naneep toman gham, ngar tiou iyaryaan naghaze nasavia Yesu Krisi varu

moghon, ve mateen toni izala ai pambaroon. *1Kor 1:23; Ga 6:14; Pil 3:8*

³ Sawa to naneep toman gham, matughezaan tiina igham ghou le tinig irur. Ve nayamaan taug naghaze tapirig imbool. *Mban 18:9; 2Kor 11:30, 12:5,9*

⁴ Ve sawa to navotia varu poia payam, you nasavsaav nanimale yes ngara to taan pa naghamb lolomim ne maau. Eemoghon Maaron Avuvu igham uraat toman tapiri ila lolomim. Tauto ipatoon ghou ighaze saveen to nasavia payam, nene saveen onoon.

⁵ Nataghon ataam tovene, lesongar to tamtoghon inim pughu pa ghurla tiam sob. Naghaze Maaron tau tapiri inim pughu pani, ghorongar poia. *2Kor 4:20; 1Tes 1:5*

Maaron Avuvu ipaghazonan ghiit pa Maaron ngar toni

⁶⁻⁷ Eemoghon yes to ngar todi imatu pa Maaron ve saveen toni, yei nisavsaav padi pa ngar tiina to Maaron to muun iyoon ve aazne ivot ighazoon. Muun kat, sawa to sambam ve taan tivot sone, ye igharaat ataam pataghaan wa, lesongar igham ghiit tala taneep tomani ila nguruba lolo. Ngar toni tonowen, ite kat pa ngar to yes ngara to taan tiasavia pa sawa tonene. Ve yes to tighamgham pooz pa sawa tonene*

tikankan panipaam. Yes pooza tonowen, muri Maaron pale itatan di tinim mbeb sorok. *Ro 16:25+; Ep 3:5,9; Kol 1:26; Yems 3:17*

* **2:6-7:** Yes pooza to Paulus isavia di, nene yes daba samsamiadi to taan, ma Ngeu Samia toman avuvu samsamiadi.

⁸ Todi eta ighazooŋ pa Maaron ŋgar toni maau. Ve inimale tighazooŋ pani, tone irau tirab Tiina toit Yesu to iza tiina pa tapiri ve poia toni ne izala ai pambarooŋ maau. *Lu 23:34; Yo 16:3; Mbanj 13:27; 2Kor 3:14*

⁹ Ngar yongaŋ to Maaron to nisasavia ne, timbood saveeŋa pataghaaŋ tighaze:

“Maaron igharaat mbeb popoiadi naol pa yes to lolodi ineep toni. Mbeb tonowen, ite kat. Tamtoghon eta ighita di pa mata, ma ilooŋ varudi pa taliŋa sone. Ve tamtoghon eta irau igham ŋgar padi paam maau.” *Is 64:4; Yer 3:16*

¹⁰ Eemoghon iit, ghoru Maaron ipaghazonaŋ ghiit pa ŋgar toni yongaŋ tonenen ila uraat to Avuvu Patabuaŋ wa. Maaron Avuvu ighita mbeb tisob. Ngar yongaŋ kat to ineep ila Maaron lolo ne paam, Avuvu ighita. *Mt 13:11; Yo 16:13*

¹¹ Laak, sei iwataŋ katin tamtoghon ite lolo? Maau. Ye tau moghon to iwataŋi. Maaron tovene paam. Tau Avuvu moghon to iwataŋ katin lolo. Ite paam maau.

¹² Avuvu to iit taghami, ye itaghon ŋgar to taan maau. Ye ivot ila to Maaron tau. Maaron igham Avuvu pait, leso tawatag mbeb popoia to ye irei di pait itaghon tau lolo ve poia toni.†

¹³ Tovenen yei nisavsaav pa mbeb tonene. Ve ŋgar to nisasavia, yei nighami ila to yes ŋgara to taan maau. Maaron tau Avuvu to ipaghazonaŋ

† **2:12:** Mbeb popoia to Paulus isavia di, nene mbeb to tagham di ila mateeŋ to Krisi izala ai pambarooŋ. Nene mbeb tovene: Krisi ireu sosor toit, ve igham ghiit taneep denjaad ila Maaron mata, ve irei Avuvu Patabuaŋ pait.

ghei pani, ve ighamgham pooz pa saveeņ isob to nisasavia. Tovenen saveeņ onoon to Maaron Avuvu isavia payei, tauto nipaghazonan pughu pa yes to titaghon ngar to Maaron Avuvu. *1Kor 1:17, 2:4*

¹⁴ Ighaze ngeu eta itaghon ngar to tamtoghon moghon, ye pale izurun ngar to inim pa Maaron Avuvu, ve ighita ngar tonowen inimale ngar to borouņa. Irau ighazoon pani maau. Pasa, Maaron Avuvu iuul ghiit, ghoru tangabiiz poian ngar tone-nen, ve taghazoon pani. *Yo 6:44, 14:17; Ro 8:5+; 1Kor 1:18,23*

¹⁵ Tamtoghon to ighaze itaghon ngar to Maaron Avuvu, nene irau ingabiiz poian mbeb tisob ve ighilaal di: Sa to poia, ve sa to samia. Tamtoghon tovene, yes to titaghon ngar to taan, irau tingabiiza maau.‡ *1Tes 5:21*

¹⁶ Pale tingabiiza vena? Maau. Pasa, saveeņ ineeep pataghaan wa. Ighaze: “*Sei iwatag katin ngar to Maaron, ve irau ipatooti pa ngar pida? Maau.*” *Ro 11:34*

Eemoghon iit, ghoru ngar to Krisi ineeep toit. *Ro 12:2; Ep 4:23*

3

Yes Korin ngar todi imatu sone

¹ Yam tonvetaz, muuņ you irau nasaav payam inimale nasavsav pa yes to titaghon ngar to Maaron Avuvu ne maau. Pasa, sawa tonenen, yam akis

‡ **2:15:** Saveeņ waaro tonene avaat inarua tamtoghon pida to Korin to tiveleg Paulus pa uraat toni, ve tiyoyou avodi pani. Ughita 2Kor 10:10.

Krisi tunja ila ngar tiam sone. Yam animale ndipain geegeu, ve ataghon ngar to lolomim mungina.

² Tauto naghama aniiñ ariana payama mau. Napaghun gham pa tuz moghon. Pasa, sawa tonenen, yam irau aghan aniiñ ariana mau. Ve aazne paam, naghita gham araua sone. *Hib 5:12+; 1Pe 2:2*

³ Aghita. Parzoraan naol tivotvot ila lolomim, ve ngar tiam iyaryaan aghaze atatan nditamim, ve agham di titaghon ngar tiam moghon. Nene ipatoon gham ighaze yam atataghon lolomim mungina sone. Laghoon tiam, yam animale yes to titaghon ngar to taan. *1Kor 1:10+, 11:18; Yems 3:16*

⁴ Pasa, yam pida aghaze: “You nataghon Paulus,” ve pida aghaze: “You nataghon Apolos,” Ngar tiam tonanan ipatoon gham ighaze yam ataghon tamtohon to taan ngar todi.

Uraata tisob to Maaron tizuaría di pa mbeb ee moghon

⁵ Laak, Apolos ne sei? Ve you Paulus, sei? Yeru mbesoona moghon to Tiina toít Yesu Krisi. Yei nigham uraat payama, tauto aghur ila toni. Onoon, ye ighur lemai uraat enaena irau ghei. Eemoghon yeru nigham uraat pa Ngeu ee moghon. *Mban 18:1+, 18:24+*

⁶ Uraat tiou, nene inimale navazog aniiñ ila uum. Ve Apolos uraat toni, nene inimale igham uraat pa uum, ve igham ya ve itutur aniiñ. Eemoghon Maaron to igham aniiñ itub iza. *Mt 13:3+*

⁷ Ngeu to ivazog aniiñ, ve ngeu to igham ya ve itutur aniiñ, yesuru ledi izadi mau. Maaron moghon to

ye le iza. Pasa, ye to igham aniiñ itub ve anoña ivot.

⁸ Tovenen ngeu to ivazog aniiñ, ve ngeu to ighamgham ya ve itutur aniiñ, uraat todi, nene pughu ee moghon. Ve muri, Tiina todi pale igham ledi atia denja itaghon uraat todi todi. *Ro 2:6*

⁹ Tovenen yeru Apolos nilup ghei ve nigham uraat to Maaron ighuri inim nimamai. Ve lupuuñ tiam, nene inimale uum to Maaron ve ruum to ye inep-neep pani. *Ep*

2:20+

Yes to tiuul lupuuñ to Krisi, tinimale ndiran to tirei ruum

¹⁰ Poia to Maaron iza tiou, ve ye igham pooz pa uraat tiou. Tauto nanimale ngeu to iwatag katin uraat to reiñ ruum, ve imuñmuuñ pani. Uraat to naghami ila lolomim, nene inimale napayoon gungun inim pughu pa Maaron ruum toni. Ve aazne, tamtoghon pida anadi tiseeñ uraat to reiñ ruum tonanan. Tovenen sei to ighaze iseeñ uraat to reiñ ruum to Maaron, ye irau igham ngar pooli, ve irei poian ruum itaghon ruum tau ngar toni. *Ro 15:20; 1Kor 4:15*

¹¹ Tamtoghon eta irau ighur mbeb ite paam inim pughu pa ruum to Maaron maau. Yesu moghon to inim pughu pani. Ve pughu tonowen, you nagharaata wa. *Ep 2:20*

¹² Yes to tirei ruum anoña, pida tirei pa malimoon ariañadi inimale gol, silva, ve yaam popoia pida. Ve pida tirei pa malimoon to ariañadi maau inimale ai, reg, ve mbeb pida.

¹³ Tala tala le ighaze taza pa sawa to gabizoon ivot, ghoros yes to tirei ruum ne, uraat todi anoña pale

ivot ighazoon. Gabizoon tonowen ngara, nene inimale tamtoghon tighur mbeb ila yab, leso titoova ve tighita: Nene mbeb ariana, ma mbeb sorok? Ighaze tirei ruum pa malimoon ariana, nene pale yab tonowen irau ighani maau. Eemoghon ighaze tirei ruum pa malimoon to ariana maau, nene pale yab ighan uraat todi gha ilale. *1Kor 4:5*

¹⁴ Tamtoghon to ighaze irei ruum to Maaron pa mbeb ariana, gabizoon to Maaron irau igham mbeb eta pa uraat toni maau. Tovenen sawa to gabizoon tonowen ivot le isob, ghoru uraat toni anona pale inepneep, ve Maaron igham le atia poia.

¹⁵ Eemoghon ighaze tamtoghon eta irei ruum to Maaron pa malimoon soroksorok, nene pale yab ighan uraat toni, ve le anona maau. Onoon, ye tau pale inep pooli. Eemoghon ye inimale ngeu to yab ighan suvun ruum toni, ve nima moghon, ve ighau ivot ila pumuri.

Lupuuñ to Krisi inimale rumai patabuan to Maaron

¹⁶ Yam awatag maau? Lupuuñ tiam, nene inimale Maaron rumai toni patabuan to ye inepneep iloon ila. Ve Maaron Avuvu inepneep toman gham ila lupuuñ tiam lolo. *1Kor 6:19; 2Kor 6:16; Ep 2:21+; 1Pe 2:5*

¹⁷ Tovenen apatum gham. Pasa, yam taumim animale rumai to Maaron. Ve rumai tonanan, mbeb toni patabuan. Tovenen ighaze tamtoghon eta iwaghamuni, nene pale ye paam, Maaron iwaghamuni.

Pale tagham ngar vena pa Maaron uraata toni?

18 Yam agham kaarom pa taumim malep. Ig-haze tiam eta ighaze ye iraua kat pa ngar to taan to aazne tamtoghon tizuaria di pani, ye irau ipul muri pa ngar tonowen, ve itaghon ngar to Krisi to ndiran to taan tighita inimale ngar to borouņa. Leso ighazoon pa Maaron ngar toni ve ataam to ineep pooi.

19 Pasa, ngar naol to tamtoghon to taan tipakur di pani, Maaron ighita di ighaze nene ngar to borouņa. Saveeņa, timbooda pataghaan wa. Isaav tovene:

“Ndiran ngara to taan titaghon ngar naol tighaze pale iuul di pa tineep pooi. Eemoghon ngar todi tonowen pale inim liis padi, ve Maaron iliis di.” *Yop 5:13; 1Kor 1:20*

20 Ve saveeņ waaro ite isaav ighaze:

“Maaron iwatag: Ngar naol to ndiran ngara to taan tiwazoran di pani, nene le anoņa maau.” *Mbo 94:11*

21 Tovenen ngar to paitoon tamtoghon izadi, yam apuli ineep. Pasa mbep to naol, nene yam tiam. Maaron ighur di pa tiuul gham.

22 Paulus, Apolos, Petrus, taan tonene, nepoon tiam, mateeņ tiam, mbep to aazne tinepneep, ve mbep to pale tivot muri ne paam. Mbep tisob tonowen, nene tiam moghon. *Ro 8:28,38-39*

23 Ve yam to Krisi. Ve Krisi, ye to Maaron. *Ro 14:8*

4

Maaron pale ingabiiz uraata toni

1 Tovenen tamtoghon irau tigham ngar pa yei uraata tovene: Yei mbesoonņa to Krisi. Ye inumeer ghei, ve ighur saveeņ toni inim tiei, leso ningini.

Saveeŋ tonene isavia Maaron ŋgar toni to muuŋ iyooŋ, ve aazne ivot ighazooŋ. *1Kor 3:5; 2Kor 6:4*

² Mbesooŋa to ighaze tiina toni inumeera ve ighur mbef ila nima pa ŋginiŋi, ye irau iŋgin poian mbef tonenen itaghon ŋgar to tiina toni. *Lu 12:42*

³ Tovenen ighaze yam, ma tamtoghon pida aŋgabiiz ghou aghaze you poiag, ma samiag, nene naghama ŋgar pani kat maau. Ve irau naŋgabiiz taug naghaze you poiag, ma samiag, nene paam maau.

⁴ Onoon, matag iŋgal naghaze uraat tiou, naghama sosor eta maau. Eemoghon irau nanumeer sorok naghaze ŋgar tiou isob denja ne maau. Naneep ve nasajan gabizooŋ to Tiina toit to muri pale ivot. Ghoru ye tau iŋgabiiz ghou. *Mban 23:1; 1Kor 3:13; 2Kor 10:18*

⁵ Yam tovene paam. Rikia aŋgabiiz tamtoghon ve aghaze yes samsamiadi, ma popoiadi malep. Aneep ve asajan sawa to Tiina toit Yesu imuul inim. Pasa, sawa tonenen ighaze ivot, ye pale ivotia mbef tisob to tiyooŋ ila ndoroom lolo, toman ŋgar tisob to tineep ŋgozaaŋ ila tamtoghon lolodi, tivot tighazooŋ. Ghoru Maaron tau ipait tamtoghon eŋaena itaghon ŋgar todi todi. *Ro 2:16; 1Kor 3:8; 2Kor 5:10; Syg 20:12*

Ŋgar to mbanooŋa to Kriŋi titaghoŋi

⁶ Yam toŋvetaz, saveeŋ isob tonene, you nasavia iza to yeru Apolos, leso nauul gham ve aghama ŋgar pooi pa yei to nipatoot gham pa Maaron aliŋa. Yam irau aghama ŋgar inim tiei. Leso yam to apapait tamtoghon eez pa ŋgar toni, ve matamim izi pa ite, apul ŋgar tiam tonanan ineep. Pasa,

ighaze agham tovene, yam amalaan pa Maaron aliņa to timbooda pataghaan wa. *Ro 12:3*

⁷ Laak, yom to upait taum, sei igham ghom ulib pa nditam? Ve sa mbeb to yom ughami ivot ila taum tapirim? Maau. Mbeb tiom tisob toman sa ngar poia to ineep tiom, yom ugham di ila to Maaron. Ighaze venen, pughu vena to tinim iza ve upakur taum inimale ngar toman mbeb tiom ivot ila to taum? *Yo 3:27; Yems 1:17; 1Pe 4:10*

⁸ Aa yam Korin, araua kat! Akaal sa mbeb muul? Pasa, yam asavsaav aghaze Maaron tapiri, yam agham katini wa. Ve aghaze aghazoon kat pa ngar toni. Ve aghaze yam anim kinik wa. Aneep ila tamtoghon eta samba muul maau.*

Eemoghon yei ghora, sone. Ve inimale saveen tiam tonanan onoon, tone poia. Leso itiņa tanim kinik ve tagham pooz. Eemoghon maau. *Syg 3:17+*

⁹ You naghita naghaze Maaron ighur yei mbanjoņa nineep muri kat. Yei ninimale yes to tighaze tirab di timaat, ve tiweu di tila pa ndug to mogheraan, lesa tirab di ila ival tiina matadi. Ve yes to timbatut ghei ne, tamtoghon to taan moghon maau. Yes anela paam. *1Kor 15:30+; 2Kor 6:4+, 11:23+*

¹⁰ Yei mbanjoņa nizuaria ghei pa taghoniin Kriisi, ve tamtoghon tighita ghei tighaze

* **4:8:** Saveen to Maaron isaav tovene: Mbon muri, ighaze Mesia inim ve ipatoon tapiri ivot ighazoon, nene pale yesņa tamtoghon toni tinim kinik ve tigham pooz pa mbeb tisob. Eemoghon tamtoghon pida to Korin ngar todi iwaghamgham. Tighaze yes to tighur ila to Kriisi ve tigham Maaron Avuvu tapiri, yes tineep tinimale yes to ndug sambam ve tinim kinik wa.

niwaghamgham ninimale borouņa. Eemoghon yam, ghoru aghaze Krisi igham gham araua kat pa ŋgar! Yei tapirimai imbool, ve lemai izamai maau. Eemoghon yam, ghoru aghaze tapirimim tintina ve izamim tintina. Yam araua kat! *Mbanj 26:24; 1Kor 2:3; 2Kor 13:9*

¹¹ Muuŋ ve inim aazne, yei pitool matmatin ghei, ve murun ghei. Ve nonogiŋa tiei popoia maau. Mareprepainja. Tamtoghon tighamgham samim ghei, ve lemai ruum to nepooŋ maau. Niwaghengheen. *Mt 8:20; 2Kor 11:27*

¹² Yei nighamgham uraat ariana pa nimamai, lesu niuul taumai. Tamtoghon tipipiyaav saveeŋ samamia payei, eemoghon yei nighason Maaron pa ighur poia toni iza todi. Ve tighurghur pataŋani payei pasa, nitaghon Krisi, eemoghon yei niyoon ariana ve nimbaada.† *Mt 5:44; Mbanj 18:3+*

¹³ Tamtoghon tiŋgalŋgal saveeŋ payei, eemoghon yei nipamuul saveeŋ poia padi. Tauto muuŋ ve inim aazne, tamtoghon tiveleg ghei kat ve tighita ghei tighaze yei samsamiamai ninimale buzbuuz to taan. *1Pe 3:9*

Paulus ipalot yes Korin ighaze titaghoni pa ŋgar toni

¹⁴ Saveeŋ tonene, you nambooda payam pa napamayanŋin gham ne maau. You lolog payam

† **4:12:** Grika ve Roma matadi izi pa yes to tighamgham uraat pa nimadi. Ve ighaze tamtoghon tigham ŋgar samia pa ŋgeu eta, ve iyati maau, nene paam Grika ve Roma tivelegi tighaze ye imatughez, ve le tapiri maau. Tovenen ŋgar to Paulus yesŋa mbanjoŋa pida titaghoni, nene igham Grika ve Roma pida tiveleg di kat.

kat, ve naghita gham naghaze you ndinatug yam. Tauto naghaze napasaluᅅgan gham. *1 Tes 2:11*

¹⁵ Pasa, ighaze yam lemim tamtoᅅhon ndiᅅndiᅅ (10,000) to tiᅅgin gham ve tipatooᅅn gham pa ataam to Kriᅅi, nene poia. Eemoghon nditamim naol maau. Tamamim ee moghon to you. Pasa, sawa to navotia varu poia payam, ve aghur ila to Yesu Kriᅅi, you nanim tamamim. *Mbaᅅ 18:11; 1 Kor 3:5+*

¹⁶ Tauto naghaze napalot gham, leso ataghon ᅅgar tiou. *1Kor 11:1; Pil 3:17, 4:9; 2Tes 3:9*

¹⁷ Pughu tonene to nambaᅅn Timoti ilat. Ye, you nanumeera ve lolog pani kat. Naghita inimale natug kat. Ye ighur ila to Tiina toit ariana, ve igham uraat itaghon Kriᅅi ᅅgar toni. Ye pale ipei ᅅgar tiam muul pa ataam to you naneep tunja ila to Kriᅅi ve nataghon ᅅgar toni. Ataam tonene, you napatooᅅn lupuuᅅn to Kriᅅi pani irau ndug ndug. *Mbaᅅ 19:22; Pil 2:19+*

¹⁸ You nawatag: Tiam pida matadi iᅅgal tighaze you irau nalat naghita gham muul maau. Tauto tipapait taudi ve tizorzoor saveeᅅ.

¹⁹ Eemoghon ighaze Tiina toit lolo pa nalat, nene pale mala maau nalat peria tiam. Pasa, naghaze naghita yes to tapapait taudi ve tizorzoor saveeᅅ, leso nawatag: Tisavsav sorok, ma tigham uraat toman Maaron tapiri?

²⁰ Pasa, pooz to Maaron, nene saveeᅅ moghon maau. Nene Maaron tau tapiri to iza to tamtoᅅhon. *1Kor 2:4+; 1Tes*

1:5

²¹ Vena? Yam aghaze naghham sa ᅅgar payam? Aghaze nalat toman toon ve nalos gham, ma nalat

toman n̄gar poia ve n̄gar to lolood pa tauud? *2Kor 13:10*

5

Paulus iyaan yes Korin pa n̄gar to ghuruuñ maat

¹ Yo, you naghaze napasalungan gham pa n̄gar pida to ivotvot tonanan. Tipaesia varumim tighaze n̄gar to ghuruuñ maat ivotvot ila lolomim. Ve tisaav tighaze tamtoghon tiam eez ivai tau tama azuwa. Aghita. Yes kankanoon̄a to tiwatag Maaron maau, yes irau tigham n̄gar samia tovene maau. *Wkp 18:8; Ep 5:3*

² Eemoghon yam agham n̄gar eta pani maau. Apuli ve ighamgham tovene. Pughu vena to apait tau-mim aghaze yam araua kat pa Maaron n̄gar toni? Inimale yam awatag katin n̄gar toni, tone lolomim ipatañan pa n̄gar to n̄geu tonanan ighami, ve azuruni pa lupuuñ tiam.

³ Onoon, you naneep toman gham maau. Eemoghon n̄gar tiou, nene inepneep tiam, ve Maaron Avuvu ilup ghiit inimale itiñ̄a tanepneep. N̄geu to igham n̄gar samia tonenen, atia to pale iza toni, you naghām n̄gar pani wa. *2Tes 3:6; 1Tim 5:20*

⁴⁻⁵ Tovenen you nasaav payam tovene: Yam irau alup gham ila Tiina toit Yesu Krisi iza, ve ila uraat to Maaron Avuvu, you pale naneep toman gham paam, ve Tiina toit Yesu tapiri iza tiam. Ghorozuru n̄geu tonanan pa lupuuñ tiam, ve aghuri ila Sadan nima, ve iyamaan katin patañani to nepoon̄ tovene. Leso itoor n̄gar toni, ve ipul n̄gar to lolo mun̄gina ineep̄le, ve sawa to Tiina toit Yesu imuul

inim, ye pale igham mulin ngeu tonanan ve ineep pooi. *Mt 18:18+; Kol 2:5; 1Tim 1:20*

Ataam to tataghon katin ngar to Pasova

⁶ Ngar tiam to apapait taumim ve aghaze araua kat pa Maaron ngar toni, nene poia maau. Yam awatag maau? Yis ngiira moghon, nene irau igham palawa tiina isar. *Mt 16:6+; Ga 5:9; Yems 4:16*

⁷ Tovenen apiyaav yis tiam munġina isob ilale. Leso aneep animale mberet paghu to le yis maau. You nawatag: Yam animale mberet paghu to le yis maau. Pasa, Krisi, ye inimale sipsip toit to Pasova to tirabi imaat inim watoonrau, lesu ireu sosor toit. *Igham 12:3+; Yo 1:29; 1Pe 1:19*

⁸ Tovenen iit irau tataghon ngar to Pasova irau sawa isob. Ngar samia to lolood munġina, iit tapuli ineep, inimale yes to tilup di pa Pasova, tipiyaav yis todi munġina ilale. Ve tapait Maaron toman tiniid iza, tagham ngar ngalaanja moghon, ve tataghon saveen onoon toman lolood. Leso tanim mberet paghu to le yis maau, ve tataghon katin ngar to Pasova. *Igham 12:18+*

⁹ You nambood rau eez ilat, ve nasaav payam tovene: Yes to tighurghur maat, yam aneep sagan padi. *2Kor 6:14+; Ep 5:11; 2Tes 3:6,14*

¹⁰ Saveen tiou tonowen, inarua ival tiina to taan to tighurghur maat ne maau. [Nene inarua yes to tighur ila to Krisi ve tighamgham ngar tone-nen.] Pasa, ighaze yam aghaze aneep sagan pa tamtoghon tisob to taan to tighurghur maat, ma matadi mbeb, ma titombaan tamtoghon lesu tigham sorokin mbeb todi, ma timbesmbees pa

maaron kaaromŋa, ghoru yam irau apul taan tonene!

¹¹ Tovenen saveen to nambooda payam, nene ŋgara tovene: Ighaze tamtoghon eta isaav ighaze ye tonvetaz to Krisi, eemoghon ighurghur maat, ma mata mbab, ma imbesmbees pa maaron kaaromŋa, ma iveveleg tamtoghon ve ipipiyaav saveen samsamia padi, ma ighunghun le iwaghamgham, ma itombaan tamtoghon leso igham sorokin mbab todi, nene tamtoghon tovene, agharui malep. Aneep saganu pani. Ghanghaniin paam, yamŋa alup malep. *Mt 18:17; Ro 16:17*

¹²⁻¹³ Yes to tineep iloon ila lupuuŋ to Krisi maau, you leg uraat pa nanjabiiz di maau. Maaron tau pale injabiiz di. Eemoghon yes to tineep iloon ila lupuuŋ toni, iit irau nanjabiiz di pa ngar todi.

Tovenen yam irau ataghan Maaron aliŋa tonene: *“Ighaze tamtoghon samia eta ineep ila lolomim, yam azuruni ighau.”* *Lo 13:5*

6

Tapayoon tonvetaz to Krisi pa savsaveen ila daba to taan matadi malep

¹ Ighaze tiam eta ita ite igham sosor pani, pughu vena to ye ipayoonda ila yes daba to taan to tiwatag Maaron maau ne matadi? Ngar tiam tonanan, mayamim pani maau? Yam awatag: Daba tonowen, ngar todi denja ila Maaron mata maau. Tovenen yam aghur patanani tiam ila tamtoghon to Maaron nimadi pa tigharaata, ghoru poia.

²⁻³ Yam awatag maau? Sawa to Mbon Muri, iit tamtoghon to Maaron pale tauuli pa uraat to

gabizoon tamtoghon to taan. Ighaze venen, pughu vena to yam irau agharaat patanjani n̄giira n̄giira to aazne tivotvot ila lolomim ne maau? Ve iit pale tan̄gabiiz yes an̄ela paam. Ighaze venen, iit irau tagharaat patanjani to taan. Pasa, nene mbeb tiina maau. *Mt 19:28*

⁴ Daba to taan ledi izadi ila lupuun to Krisi lolo maau. Pughu vena to yam aghurghur patanjani tiam to taan ila ndiran tovene nimadi pa tigharaat di?

⁵ Nambood saveen̄ tonene payam, leso mayamim pa n̄gar to aghamghami. Vena, tiam eta le n̄gar irau to igharaat ton̄vetaz to Krisi saveen̄ todi maau?

⁶⁻⁷ Eemoghon yam ataghon ataam tovene maau. Yam apayoon ton̄vetaz tiam to tighur ila to Krisi ne, ila yes daba to taan to tighur ila maau ne matadi. Ngar tiam tonanan ipatoon̄ gham ighaze yam atap wa. Vena, ighaze ton̄vetaz tiam eta itombaan gham pa igham sorokin mbeb tiam, ma igham sosor ite paam payam, irau apul sosor toni maau? *Mt 5:39+; Ro 12:17+; 1Pe 3:9*

⁸ Eemoghon yam ataghon ataam tovene maau. Pasa, ton̄vetaz tiam to yam̄na aneep ila lupuun to Krisi lolo, tauto aghamgham sosor padi, ve atombaan di pa ayoun̄ sorokin mbeb todi.

⁹ Yam awatag maau? Ighaze tamtoghon eta ighamgham n̄gar to den̄ja maau, ye irau itaghon Maaron pooz toni ve iloon̄ ila ndug toni ne maau. Tovenen agham kaarom pa taumim malep. Yes to matadi samia tinimale n̄gavuun, yes to timbesm-bees pa maaron kaarom̄na, yes to tighurghur maat, nditamoot to timomogheer pa nditadi nditamoot pida,

¹⁰ yes yubyubņa, yes to matadi mbeb, yes ghunuunja, yes to matadi izi pa nditadi ve tipiyaav saveen samsamia padi, ve yes to titombaan tamtoghon pa tigham sorokin mbeb todi, tamtoghon tisob to tighamgham tovene, yes irau titaghon pooz to Maaron ve tiloon tila ndug toni ne maau. *Ga 5:19+; Ep 5:5; Hib 12:14; Syg 21:8, 22:15*

¹¹ Muun, yam pida ataghon ngar tovene paam. Eemoghon aazne, ila uraat to Yesu Krisi, Maaron Avuvu igham uraat payam. Tauto Maaron igham gham angalaan, ve anim tamtoghon toni patabuanja, ve aneep denjamim ila mata wa. *1Kor 1:2; Ep 2:1+; Kol 3:7+; Tit 3:3+*

Anoņaad, nene inimale rumai to Avuvu Patabuan

¹² Yam pida asavsav aghaze: “You irau naghama ngar to naol ne. Mbeb eta le ngalsekiin maau.” Nanan poia. Eemoghon ngar tisob irau tiuul ghiit maau. Ve mbeb ite paam. You lollog pa mbeb samia eta igham pooz payou ve nanim mbesoonja pani ne maau. *Yo 8:34; 1Kor 10:23*

¹³ Ve yam pida asavsav aghaze: “Aniin, nene mbeb to apood. Ve apood ineep pa aniin izila. Ve muri, Maaron pale ipasob mbeb ru tonenen.”*

* **6:13:** Saveen to aniin ve apood, nene iza to nditamoot ve ndiliva anoņadi. Ival tiina to ndug Korin matadi samsamia tinimale ngavuun. Ve ngar todi iwagamgham tighaze ndiliva anoņadi, nene ineep pa nditamoot timogheer padi moghon. Ve sa ngar to ighaze tamtoghon tigham pa anoņadi, nene mbeb sorok. Irau igham mbeb eta pa anunudi maau. Pasa, muri, anoņadi pale imaat ve ilale, ve anunudi moghon, ghoroo ineep mata iyaryaar.

Saveeŋ tiam tonanan onoon. Eemoghon anoŋaad ineep pa igham ŋgar samia inimale ŋgavuun maau. Anoŋaad ineep pa imbees pa Ngeu Tiina. Ve Ngeu Tiina igham ŋgar tiina pa anoŋaad. *1Tes 4:3+*

¹⁴ Aghita. Maaron ipamundigin Tiina toit Yesu pa mateeŋ wa. Ve muri, Maaron tapiri pale ipamundigin ghiit paam pa mateeŋ ve igham leed anoŋaad paghu. *Ro 8:11; 2Kor 4:14; Ep 1:19+*

¹⁵ Yam awatag maau? Anonamim, nene inimale Krisi anoŋa pida pida. Vena, ighaze tagham Krisi anoŋa pida ve talupi toman liva to ataam, pale poia? Maau kat! *1Kor 12:27*

¹⁶ Yam awatag maau? Ighaze tamoot eta ipaak anoŋa ila liva to ataam anoŋa, nene yesuru tilup di tinim ee moghon. Saveeŋa ineep pataghaaŋ wa: “*Yesuru pale tilup di tinim ee moghon.*” *Mbnp 2:24*

¹⁷ Eemoghon tamtoghon to inim Tiina toit le ne, ila uraat to Maaron Avuvu, yesuru Krisi tilup di tinim ee moghon. Vena, tamtoghon tovene irau ilup tau toman liva to ataam muul? Nene pale maau. *Yo 17:21+; 1Kor 12:13; Ep 4:4*

¹⁸ Tovenen ŋgar to mataad samia tanimale ŋgavuun, yam aneep saganuun pani. Pasa, ŋgar tonene raraate inimale sosor pida maau. Sosor toit pida tinjarua tauud anoŋaad maau. Eemoghon tamtoghon to ighaze igham ŋgar tonene, nene igham sosor pa tau anoŋa. *Ep 5:3; 1Tes 4:3; Hib 13:4*

¹⁹ Yam awatag maau? Anonamim, nene inimale rumai to Avuvu Patabuan ineep iloon ila. Pasa, Maaron igham Avuvu payam, ve aazne ye ineep ila lolomim. Tovenen yam anŋin taumim muul maau. *Ro 14:7+; 1Kor 3:16+; 2Kor 6:16*

²⁰ Maaron ighol gham anim le wa. Tovenen sa ngar to ighaze aghami pa anonjamim, yam irau aghami pa apait Maaron iza. *1Kor 7:23; Pil 1:20; Hib 9:12; 1Pe 1:18+*

7

Vaiiuŋ ngara pida

¹ Yo, naghaze napamuul saveeŋ pida to ambooda ila rau tiam. Yam asaav tovene: “Ighaze tamoot eta itut liva eta maau, nene poia.”

² Eemoghon ngar to ghuruuŋ maat, nene ivot inim tiina. Tovenen ighaze tamoot eta yesuru azuwa tineep sagan pa taudi, ve tilup di pa ghenooŋ maau, nene poia maau. Poia pa yesuru tilup di.

³ Vaivaiŋa irau titaghon vaiiuŋ ngara. Ighaze liva eta ighason azuwa ighaze yesuru tigheen, nene tamoot irau iyok pani. Ve tamoot tovene paam. Ighaze ighason azuwa ighaze yesuru tigheen, nene liva irau iyok pani. *Igham 21:10*

⁴ Liva iŋgin tau anoŋa maau. Azuwa tamoot to iŋgini. Ve tamoot tovene paam. Ye iŋgin tau anoŋa maau. Azuwa liva to iŋgini.

⁵ Tovenen yam vaivaiŋa angoruut taumim pa ndizwamim malep. Eemoghon ighaze yamru azuwam aghaze asapaar pa taumim, lesa apul soso ris pa sunjuuŋ, nene poia. Eemoghon muri, yamru irau alup gham muul. Pa vene, irau atatan ghaara tiam maau, ve Sadan iwat gham ve atap.

⁶ Saveeŋ to nasavia pa saparooŋ, you nasavia pa naghams ngar payam moghon. Ve napariaaŋa inim tutuuŋ pa ataghoŋi ne maau.

⁷ You naghaze le tamtoghon tisob tivai maau tinimale you, ghoru poia. Eemoghon Maaron ighur leed nepoon naol naol. Tauto pida tivai, ve pida tivai maau. Ve sa nepoon to ye igham pait, nene poia toni pale ineep toman ghiit. *Mt 19:11+*

Saveen injarua yes osa ve ndinaara

⁸ Yo, yam osa ve ndinaara, you nasaav payam tovene: Ighaze avai muul maau, ve aneep animale you, ghoru poia.

⁹ Eemoghon ighaze yam irau atatan ghaara tiam maau, avai lak. Pa vene, ghaara tiam ipazaagh gham ve agham sosor. *1Tim 5:14*

Vaivainja irau tipul ndizwadi maau

¹⁰ Ve yam vaivainja, you naghur tutuun tonene payam: Liva eta irau ipul azuwa ve irab motin vaiuun toni maau. Saveen tonene, nene you taug saveen tiou maau. Nene Tiina toit tau aliņa.

¹¹ Ve ighaze liva eta ipul azuwa ve irab motin vaiuun todi, ye irau ivai muul maau. Ineep moghon. Ve ighaze maau, ye irau imuul ila to azuwa mungina, ve yesuru tilup di muul toman lolodi ee moghon. Ve yes nditamoot tovene paam. Tizurun ndizwadi malep. *Mal 2:16; Mt 5:32; 19:3+; Mk 10:11+*

Saveen pida to injarua yes to ndizwadi tighur ila maau

¹² Ve yam pida to ndizwamim tighur ila to Krisi maau, you nasaav payam tovene. Ighaze tonvetaz eta to Krisi azuwa ighur ila maau, ve liva iyok pa nepoon todi tonowen, nene tamoot tonenen irau irab motin vaiuun todi maau. Saveen tonene, nene Tiina toit aliņa maau. Nene you ngar tiou.

13 Ve ighaze liva eta azuwa ighur ila to Krisi maau, ve tamoot iyok pa nepoonj todi tonowen, nene liva tonenen paam irau irab motin vaiuunj todi maau.

14 Pasa, liva ma tamoot to ighaze ighur ila, ye inim ataam pa azuwa to ighur ila maau ne, leso inim Maaron le. Ighaze maau, tone ndinatumim tisami ila Maaron mata. Eemoghon maau. Pasa, yam ndamomim padi, tauto tinim Maaron le.

15 Eemoghon ighaze tonjvetaz eta to Krisi azuwa ighur ila maau, ve azuwa tonenen ngar toni iyaryaaj kat ighaze irab motin vaiuunj todi, nene ye to ighur ila, irau iyok pani, ve ipuli ila. Ngar tovene, le ngalsekiinj maau. Pasa, Maaron ighaze iit tataghon ngar luuma. *Ro 12:18, 14:19*

16 Yom liva to ughur ila, uwatag maau. Pale unum ataam pa azuwam tamoot ve Maaron igham mulini. Ve yom tamoot tovene paam. Uwatag maau. Pale unum ataam pa azuwam liva, ve Maaron igham mulini. *1Pe 3:1*

Sa nepoonj to Maaron igham pait, nene lolood poia pani moghon

17 Sa nepoonj to Tiina toit ighuri pait, nene lolood poia pani moghon. Tovenen nepoonjaad to taghami indeej sawa to Maaron ipoi ghiit tanim le, iit tayok pani moghon. Saveej tonene, you napatoot lupuunj to Krisi pani irau ndug ndug.

18 Tovenen ighaze ngeu eta tiziri, ve muri Maaron ipoi inim le, nene ngeu tonenen ikaal ataam pa tigharaat tini malep. Ve ighaze ngeu eta tiziri maau ve Maaron ipoi inim le, ye igham ngar pa ziriinj malep.

¹⁹ Pasa, ighaze tizir ghiit, ma tizir ghiit maau, nene mbeb sorok. Ve ngar to taghoniñ Maaron tutuun toni, nene mbeb tau. *Ro 2:25; Ga 5:6, 6:15*

²⁰ Tovenen sa nepoon to tamtoghon enaenja tighami indeen sawa to Maaron ipoi di tinim le, yes irau lolodi poia pani ve tineep tovene.

²¹ Ighaze yom mbesoonja sorok, ve Maaron ipoi ghom unum le, lolom ipatanjan pa uraat tiom malep. Eemoghon ighaze ataam poia eta ivot pa upas taum pa uraat tiom tonanan, nene poia. Utaghoni moghon.

²² Pasa, ighaze tamtoghon eta inim mbesoonja sorok, ve Tiina toit ipoi, nene tamtoghon tonenen inim mbesoonja muul maau. Onoon, uraat to mbesoonja, ye pale ighami. Eemoghon Kriisi ipasi pa samia tapiri to muun ikisi, ve ye inim Kriisi le wa. Ve tamtoghon to ighaze ye mbesoonja maau ve ingin tau, ve Kriisi ipoi inim le, ye mbesoonja to Kriisi. *Yo 8:36; Ga 3:28; Kol 3:24; 1Pe 2:16*

²³ Aghita. Maaron ighol gham anim le wa. Tovenen anim mbesoonja pa ngar to tamtoghon malep. *1Kor 6:20; 1Pe 1:18+*

²⁴ Tovenen yam tonvetaz, sa nepoon to iit enaenja taghami indeen sawa to Maaron ipoi ghiit tanim le, iit irau tineep tunja ila to Maaron, ve tataghoni tovene gha ila.

Saveen injarua yes to tivai sone

²⁵ You leg saveen pida pa yes to tivai sone. Saveen tonene, nene tutuun to Tiina toit maau. Nene taug ngar tiou. Eemoghon Tiina toit igham poian ghou, ve igham leg ngar. Tovenen yam irau aghur ila saveen tiou tonene, ve ataghoni.

²⁶ Aazne, iit taneep ila sawa to patañani. Tovenen you naghita naghaze sa nepoonj to aazne iit enjaena taghami, nene poia pa taneep tovene gha tala.

²⁷ Tovenen ighaze yom uvai wa, ukaal ataam pa urab motin vaiuuj tiam ve uzurun azuwam malep. Uneep toman azuwam tonanan. Ve ighaze uvai sone, uzuaria ghom pa vaiuuj malep.

²⁸ Eemoghon ighaze uvai, nene poia paam. Ugham sosor maau. Ve ndiliva papaghu paam. Ighaze tivai, yes tigham sosor maau. Eemoghon you nawatag: Nepoonj to vaivainja, yes pale tindeen patañani naol. Ve lolog pa patañani tovene igham gham malep. Tauto nasavia saveenj tonene payam.

Tagham ngar tiina pa mbeb to taan malep

²⁹ Yam tonjetaz, saveenj tiou tonene, pughu tovene. Sawa inim igharau wa. Tovenen aazne ve ila, tagham ngar tiina pa nepoonj toit to taan malep. Tovenen vaivainja nditamoot, yes irau tineep tinimale yes to ledi ndizwadi maau. *Ro 13:11+; 1Kor 10:11; 1Pe 4.7*

³⁰ Ve yes to lolodi ipatañan, yes irau tineep tinimale yes to lolodi ipatañan maau. Ve yes to lolodi poia, yes irau tineep tinimale yes to lolodi poia maau. Ve yes to tigholghol ledi mbeb, yes irau tigham ngar tovene: Mbeb tonowen, nene mbeb to taudi, leso tikisi mala ne maau.

³¹ Ve yes to tighamgham uraat pa mbeb to taan, nene ngar todi ineep ila mbeb tonowen kat malep. Pasa, iit tawatag: Taan tonene toman taan ngara, nene irau ineep le alok maau. Ighaze isob tonene. *2Pe 3:11+; 1Yo 2:15+; Syg 21:1*

³² You naghaze patanani naol to taan igham lolomim imbumbu ve agham ngar naol malep. Tauto nasavia saveen tonene. Ngeu paghu to ighaze ighur ila to Kriisi, nene ighamgham ngar tiina pa Tiina toit ve uraat toni, ve izuaria tau ighaze le igham Kriisi lolo poia.

³³ Eemoghon ngeu vaivain, ye ighamgham ngar naol pa mbep to taan, ve izuaria tau lesu igham azuwa lolo poia. *Lu 14:20*

³⁴ Tovenen ngar toni inim ru. Ve yes ndinaara ve ndiliva papaghu to tighur ila to Kriisi, tovene paam. Tighamgham ngar pa Tiina toit ve uraat toni, ve tighaze le tighur ngar todi ve lolodi, toman anonadi isob ila pani. Eemoghon ndiliva vaivain, yes tighamgham ngar naol pa mbep to taan, ve tighaze tigham ndizwadi lolodi poia. *1Tim 5:5*

³⁵ Saveen tiou tonene, nasavia pa nangalsekin gham pa vaiuun maau. Nene nasavia pa nauul gham, lesu ngar tiam inim ru sob, ve apul taumim kat pa Tiina toit ve uraat toni, ve ataghon ngar denja moghon ila mata.

³⁶ Ighaze ngeu eta igham ngar ighaze ye irau ivai maau, eemoghon muri, mata ingal ighaze ngar to igham pa liva to tisia pani, nene denja maau, ve ngar toni iyaryaan ighaze ivaii, nene poia pa itaghon ngar toni, ve yesuru tivai. Nene sosor maau.

³⁷ Eemoghon ighaze ngeu eta ngar toni iyaryaan ighaze ivai malep, ve irau itatan ghaara toni, ve ighaze tamtoghon eta ingalsekini pa vaiuun maau, ve ye itaghon tau lolo ve ivai maau, ye igham ngar poia.

³⁸ Tovenen ngeu to ighaze ivai, nene igham ngar

poia. Ve ngeu to ighaze ivai maau, nene igham ngar poia kat.* *Hib 13:4*

³⁹ Ighaze liva vaivainj eta azuwa ineep mata iyaryaar, liva tonenen irau irab motin vaiuunj todi maau. Ye irau ineep toman azuwa. Ve ighaze muri azuwa imaat, ve liva tonenen ighaze ivai muul, nene poia. Ye igham sosor eta maau. Eemoghon ivai sorok malep. Ye irau ighita le ngeu eta to ighur ila to Tiina toit, ghoru ivaii. *Ro 7:2+; 2Kor 6:14*

⁴⁰ Eemoghon you naghita naghaze: Yes ndinaara to tivai muul maau, ve tineep sorok, yes pale tinidi iza ve poia tiina to Maaron iza todi ilib pa yes to tivai muul. Saveenj tonene, you naghita naghaze Maaron Avuvu igham pooz payou ve nasavia.

8

Paulus isavia watoonjrau to tamtoghon tigham di pa maaron kaaromnja

¹ Yo, naghaze nasaav ris pa mbeb to tigham di tinim watoonjrau pa maaron kaaromnja.

Yam pida asavsaav aghaze: “Yei nisob lemai ngar. Nikankan pa mbeb tonowen ngara maau.”

* **7:38:** Tamtoghon pida to Korin avaat tigham ngar tighaze ngar to vaiuunj, nene poia kat ila Maaron mata maau. Tauto Paulus imbood saveenj tonene. Ngara pida, matadi ingal tighaze saveenj tonene injarua Korin pida to tiyokia ndinatudi liva pa vaiuunj maau. Ve ngara pida tighaze saveenj tonene injarua ndiran pida to tisia ndiliva padi, eemoghon yes rikia tivai di maau. Tovenen ndiliva tonowen tisanjan tisanjan le ndaman todi izala wa. Ve ngara pida tighaze saveenj tonene injarua tamtoghon pida to tivai, eemoghon yesnja ndizwadi tiluplup di pa ghenoonj maau. Pasa, timatughez: Ighaze yesnja ndizwadi tilup di pa ghenoonj, nene pale ipoon di pa Maaron.

Nene poia. Eemoghon apatum gham. Pasa, ngar toit igham ghiit tapait tauud ve taghaze talib pa nditaad pida. Eemoghon ngar to lolood pa tauud, nene igham ghiit takaal ataam pa tauul nditaad ve tapalot di. *Mbanj 15:20; Ro 14:3*

² Ighaze tamtoghon eta igham ngar ighaze ye iraua kat pa ngar, nene ipatoonja ighaze ye igham ngar iraua sone. *1Kor 3:18, 13:12; Ga 6:3*

³ Eemoghon ighaze tamtoghon eta lolo pa Maaron, nene Maaron iwatagi ve ighami inim le wa.

⁴ Yo, yam aghason ghou aghaze irau taghan mbbeb to tirab di tinim watoonrau pa maaron kaaromnja, ma maau?

Iit tawatag: Maaron kaaromnja to naol ne, nene Maaron tau maau. Nene mbbeb anunudi sorok. Pasa, Maaron ee moghon to inepneep. Ite paam maau. *1Kor 10:19+; Ga 4:8; Ep 4:5+*

⁵ Onoon, tamtoghon tighur ila to mbbeb naol naol to sambam paronjanja ve taan, ve tiwaat di tighaze maaron todi ve tiina todi.

⁶ Eemoghon iit, ghoru taghur ila to Maaron ee moghon. Ye Tamaan to inim pughu pa mbbeb tisob, ve iit taneep pa tambees pani. Ve taghur ila to Tiina toit ee moghon. Nene Yesu Krisi. Ye to inim ataam pa mbbeb tisob ve tivot, ve ye to inim pughu pa nepoonj toit. *Yo 1:3+; Mbanj 17:28; Ro 11:36; Pil 2:11*

⁷ Eemoghon tamtoghon pida to ghurla todi iyaryaanj sone, tighilaal mbbeb tonene maau. Pasa, muunj ve inim, timbesmbees pa maaron kaaromnja. Tovenen aazne, ighaze tighan mbbeb eta to tighami inim watoonrau pa maaron kaarom

eta, nene tiyamaan taudi tighaze tigham sosor ve tisami ila Maaron mata.* *Ro 14:23; 1Kor 10:28+*

⁸ Onoon, mbeb to naol ne, ighaze taghan di, ma taghan di maau, nene irau igham ghiit tagharau Maaron, ma ipoon ghiit pani ne maau. Pasa, mbeb tovene irau igham ghiit tanim popoiaad, ma tasami ila Maaron mata ne maau. *Mk 7:19; Ro 14:14*

⁹ Eemoghon yam to aghazoon pa mbeb tonene, ve awatag aghaze yam irau aghan mbeb to naol ne, apatum gham. Pasa, ighaze aghan mbeb to tighami inim watoonrau pa maaron kaarom eta, ve yes to ghurla todi iyaryaan sone tighita gham, nene pale agham di titap pa ghurla todi. *Ro 14:13+; Ga 5:13*

¹⁰ Yom to ughazoon pa Maaron ngar toni, ighaze ughan iloon ila rumai to maaron kaarom eta, nene poia. Eemoghon ighaze ngeu eta to ghurla toni iyaryaan sone ve imatughez pa ghaniin mbeb tovene, ighita ghom, nene pale ipazaagha pa ghaniin mbeb tonowen paam. Tovenen muri, ye pale iyamaan tau ighaze ye igham sosor ila Maaron mata.

¹¹ Upatum ghom wa? Ngeu to ghurla toni iyaryaan sone ve imatughez pa ghaniin mbeb tovene, ye tonvetaz tiom to Krisi imaat pani. Eemoghon ngar to ughami, nene iwaghamuni.

* **8:7:** Sawa to yes to tikankaan pa Maaron tigham watoonrau, ndiran to watoonrau tirab mbeb tonowen, ve timoz minda suruvu izala artaal iloon ila rumai to maaron kaarom tonowen. Ve suruvu, nene yes to tila pa sunuun, tighami tivot tila pumuri, ve timozi ve yesna nditadi pida tighani, ma tighami tila nal ina, leso tamtoohon tigholi.

¹² Yam irau matamim inġal tonġvetaz tiam pida to ghurla todi iyaryaan sone. Ighaze agham di tiyamaan taudi tighaze tigham sosor ve lolodi ipataġan, yam agham sosor padi, ve agham sosor pa Kriſi paam.

¹³ Tovenen ighaze mbeb eta to taghani, irau igham tonġvetaz tiou eta to Kriſi itap pa ghurla toni, nene irau naghan mbeb tonenen muul maau. Pa vene, naghham tonġvetaz tiou tonenen itap ma venen. *Ro 14:19+*

9

Pughu to Paulus izurun atia to yes Korin tighaze tigham

¹ You tonene, tamtoġhon eta inġin ghou maau. Nanġin taug. Ve izag pa uraat to mbaġoġġa, ve naghita katin Tiina toiti Yesu. Ve uraat to naghami toman Tiina toiti tapiri, anoġa toni nene lupuuġ tiam. Yam Korin aghilaal mbeb naol tonene, ma maau?

Mbaġ 9:3+; 1Kor 3:5+, 4:15

² Onoon, tamtoġhon pida tighita ghou tighaze you mbaġoġġa tau to Kriſi maau. Eemogħon yam, għoro awatag. Pasa, uraat to naghami ila lolomim ve ighur anoġa ivot, tauto ipatoġġ ghou ighaze you mbaġoġġa tau to Tiina toiti.

³ Yes to tinġabiiz ghou tighaze you mbaġoġġa tau maau, you napamuul saveeġ todi tovene:

⁴ Vena, yei to nighamgham uraat to Tiina toiti ne, lemai izamai pa nigham aniin ve ya inim uraat tiei atia, ma maau?

Lu 10:8

⁵ Onoon, yei uraata pida nivai maau. Ve inimale nivai ve ndizwamai tighur ila, tone irau nigham di ve yeiġa nilaghlaagh pa uraat to Kriſi inimale

Petrus toman mbanjoonja pida ve Tiina toit nditazi tighamghami.

⁶ Ma vena, yam aghaze yeru Banabas moghon nigham uraat pa nimamai, leso niuul taumai pa nepoonj tiei, ve yes pida maau?

⁷ Agham ngar pa yes ndaaba. Todi eta ikaal yaam ve aniiñ, leso ingin tau pa nepoonj toni? Maau. Ve ighaze tamtoghon eta ivazog vaen, pale tau irau ighan anonja maau? Maau. Ye pale ighan. Ve vena, nginiñ to sipsip ve mekmek irau igham tuz todi ve ighun, ma maau? *2Tim 2:6*

⁸⁻⁹ Vena, saveen tiou tonene, you nataghon ngar to tamtoghon ve nasavia? Maau. Pasa, tutuun to Mose isavia saveenj raraate tovene: *“Ighaze bapolo ighamgham uraat pa vazaguunj wit leso uli imalab, yom upoon avo malep. Ye paam irau ighan a aniiñ.”* *Lo 25:4; 1Tim 5:17+*

Vena, Maaron igham ngar pa bapolo moghon, ve ighur tutuunj tonene?

¹⁰ Maau. Ye isavia saveenj tonene inarua ghiit paam. Aghita. Yes to timbut taan pa vazogiñ aniiñ, ve yes to tindou wit ve tigham uraat pa walabuunj uli, yes irau tigham adi aniiñ anonja pida inim ndamodi, ghoru poia. Pughu tonene to timbood tutuunj tonene pait.

¹¹ Sawa to nigham uraat ila lolomim, yei nivazog uuv popoia to Avuvu Patabuanj. Tovenen ighaze yei nigham ulaan pida ilat tiam, nene denja. Ma vena? Aghita aghaze yei nighur matamai payam pa mbeb tiina eta? *Ro 15:27; Ga 6:6*

¹² Ndiran pida, yam aghita di aghaze yes ledi izadi pa tigham ulaan ilat tiam. Nene poia. Ngar

tonanan denja. Eemoghon yei, ghoru denja kat pa nigham ulaan pida ilat tiam.

Eemoghon muun ve inim, yei niyok payam pa auul ghei maau. Pa vene, ipoon ataam pa varu poia to Krisi. Onoon, ataam to nitaghoni pa uraat tiei, nene igham patanani payei. Eemoghon sa patanani to ighaze ivot payei, yeru irau nimbaada. *Mban 20:33+; 1Tes 2:9*

¹³ Yam awatag maau? Yes to tighamgham uraat ila Rumai to Maaron lolo, tighanghan aniiñ to rumai. Ve ighaze tamtoghon tigham mbeb eta inim watoonrau, nene tighur mbeb tonenen suruvu izala artaal inim watoonrau, ve suruvu izi pa yes to tighamgham uraat pa watoonrau, lesu tighani. *Wkp 6:16,26; Lo 18:1*

¹⁴ Yes to tivovotia varu poia, tovene paam. Tiina toit ighur tutuun pait ighaze: Yes irau tigham ledi atia pa uraat todi to votiaan varu poia. Lesu iuul di pa nepoon todi. *Lu 10:7; 1Tim 5:17+*

¹⁵ Tovenen you leg izag pa naghams leg atia pa uraat tiou. Eemoghon muun ve inim, nayok pa ngar tovene maau. Ve aazne paam, nambood saveen tonene pa napamundigin gham, lesu agham leg atia ne maau. Lolog pa ngar tovene maau kat. Pasa, ataam to nataghoni pa uraat tiou, tauto igham ghou tinig iza. Tovenen sawa to nanee matag iyaryaar, irau nayok pa agham leg ulaan eta ne maau. Aneep namaat nala, ghoru sa to aghaze aghami, aghamghami lak! *Mban 18:3, 20:34; 2Kor 11:10*

¹⁶ Ighaze you navotia varu poia, nene leg pughu eta pa napakur taug ne maau. Pasa, Maaron tau ighur uraat tonene inim nimag. Tovenen you irau

naghami. Ighaze navotia varu poia maau, nene nakaria taug wa. *Yer 20:9; Mban 26:16+; Ro 1:14+¹⁷* Ve inimale nataghon taug lolog ve naghama uraat tonene, tone naghama ngar pa leg atia. Eemoghon maau. Pasa, nanim mbesoona to Maaron, ve ye inumeer ghou ve ighur uraat tonene inim nimag. *1Kor 4:1; Ga 2:7; Kol 1:25*

¹⁸ Tovenen sa to pale naghama inim leg atia? Atia tiou, nene vene: Sawa to navotia varu poia pa tamtoghon, you napoi pa atia to izag pani ne maau. Naghama uraat padi sorok. Ve ngar tonene, to ighama ghou tinig iza ve lolog poia. Atia tiou, tau tonene.

Paulus itaghon tamtoghon gabuadi, lesa ighereb di tinim Krisi le

¹⁹ You tonene, tamtoghon eta ingin ghou maau. Nanjin taug. Eemoghon taug lolog ve nanim mbesoona pa tamtoghon tisob, lesa naghareb tamtoghon katindi tinim Krisi le. *Mt 20:26+; Ga 5:13*

²⁰ Tovenen sawa to naneep toman yes Yuda, you nataghon di pa gabuadi, lesa naghareb di tinim Krisi le. Onoon, you naneep ila tutuunj todi samba maau. Eemoghon sawa to naneep toman di, naneep nanimale yes to tineep ila tutuunj samba, lesa naghareb di tinim Krisi le. *Mban 16:3, 21:26*

²¹ Ve sawa to naneep toman ndug ndug to tikankaan pa tutuunj to yes Yuda, you nataghon gabuadi, ve naneep nanimale yes to tikankaan pa tutuunj tonowen. Pasa, naghaze le naghareb di paam tinim Krisi le. Eemoghon you nazoor tutuunj to Maaron maau. Pasa, you naneep ila tutuunj to Krisi samba.

²² Ighaze naneep toman yes to ghurla todi iyaryaṅ sone, you nataghon di pa gabuadi ve nepooṅ todi. Leso napamundigin ghurla todi ve tineep tunja ila to Krisi. Tovenen you nataghon tamtoghon tisob gabuadi ve nepooṅ todi, lesa naghām mulin tamtoghon todi pida. Sa ataam to irau iuul di, nene you nataghoni. *Ro 15:1+; 1Kor 10:33*

²³ Tovenen ṅgar tisob to nataghon di, you naghām di lesa varu poia ilaan irau tamtoghon tisob, ve yeiṅa nighita poia to Maaron iza tiei.

Mataad iza pa landooṅ to Maaron

²⁴ Iit tawatag: Ighaze landooṅ eta ivot, nene tamtoghon to landooṅ tonenen pale tisob tilaan. Ve tamtoghon todi ee moghon, to pale ilaan le ilib pa ndita, ve ighām le atia. Tovenen matamim iza pa landooṅ to Maaron, ve alaan toman tapirimim. Leso alib ve aghām lemim atia poia. *Pil 2:16, 3:14; 2Tim 4:7+; Hib 12:1*

²⁵ Tamtoghon tisob to tighaze tilaan pa landooṅ eta, tisapaar pooi pa mbeb naol naol. Leso tilaan toman tapiridi. Ve atia to tizuaria di pani, nene ineep mala maau. Rikia moghon ve isami. Eemoghon iit, ghoru tazuarua ghiit pa atia poia to pale ineep le alok. Irau isami maau. *1Tim 6:12; 2Tim 2:5; Yems 1:12; 1Pe 1:4*

²⁶ You nanim tamtoghon to ilandaad ve mata in-esnes maau. Matag denja pa ndug to landooṅ ila isob pani, ve nalaan naṅarua. Ve you nanimale ṅgeu to iparab ve ipiyaav nima soroksorok maau. You nanimale ṅgeu to ipiyaav nima, ve irab katin tamtoghon.

²⁷ You narab katin taug anonag, lesa natatan ngar samsamia to lolog munjina. Pasa, namatughez. Ighaze navotia Maaron aliņa pa tamtoghon, ve ngar tiou pida isosor, nene pale muri tigham atia tiou ila pa tamtoghon ite, ve naneep sorok. *Ro 13:14; Pil 3:13+; Kol 3:5*

10

Ighaze tagham sosor, Maaron pale ighur atia pait inimale muun igham pa yes Israela

¹ Yam tonvetaz, you naghaze matamim ingal muul pa mbeb to muun ivot pa nditimbuud. Sawa to yesņa Mose tipul Isip, Maaron igham yaghur tae ivot lesa ipoon di ve ipatoon di pa ataam. Ve yes tisob tineep ila yaghur tae tonowen samba, ve tisob timbut Te Kaviaaņa ve tivool tila pa paņa ite. *Igham 13:21+, 14:22+*

² Yaghur tae ve te tonowen ngara, nene inimale yes Israela tigham ya. Pasa, sawa tonenen ve ila, yes titaghon Mose pa ngar toni, ve tigham nepoon paghu.

³⁻⁴ Ve aniiņ ve ya to Maaron Avuvu igham padi, yes tisob tighan ve tighun. Ya tonowen ivotvot ila yaam to Maaron Avuvu to itaghon di pa laghoon todi. Yaam tonowen, nene Krisi. *Igham 16:14+, 17:1+; Nam 20:1+*

⁵ Eemoghon muri, tamtoghon todi katindi tizoor Maaron aliņa. Tauto ate yabyab padi, ve irab di

timatmaat izi ndug balim.* *Nam 14:29+; Hib 3:17+; Jud 5*

⁶ Mbeb to ivot pa yes Israela pa sawa tonenen, nene inim patonjaan pait. Leso taghilaal, ve lolood igham pa mbeb samsamia tanimale yes malep. *Nam 11:4; Mbo 106:14*

⁷ Tovenen yam ambees pa maaron kaaromja inimale muun yes Israela pida tighami malep. Pasa, Maaron aliya isaav tovene: [Sawa to yes Israela tigharaat makau pa gol, ve tipait mbeb tonowen inimale maaron todi.]

“Ival tiina mboledi izi pa ghanghaniin ve ghunghunuun, ghoru tipamundigin mogheraan toman ngar samsamia naol.”
Igham 32:6

⁸ Ve mataad samia tanimale ngavuun malep. Pasa, Israela pida tigham tovene, ve tamtoghon todi 23,000 timatmaat pa ndag ee moghon. *Nam 25:1+; Mbo 106:29; Syg 2:14*

⁹ Ve tatoov Tiina toit tapiri malep. Pasa muun, Israela pida tigham tovene, ve moot samsamiadi tivot, ve tighan di timatmaat. *Igham 17:2-7; Nam 21:5+; Mbo 95:9*

¹⁰ Ve tayou avood pa Maaron toman uraata toni malep. Pasa muun, Israela pida tigham tovene,

* **10:5:** Tamtoghon pida to Korin avaat tigham ngar tovene: Yes tigham ya wa, ve tighanghan pasa. Tovenen ighaze timalaan pa tutuun to Maaron, nene mbeb sorok. Pasa, ya to tighami, toman pasa to tighanghani, nene pale igharaat di ila Maaron mata. Eemoghon Paulus isaav pa yes Korin ighaze tinumeer ya ve pasa kat malep. Pasa, Maaron irau ighurghur di maau. Ighaze tizoor aliya, ye pale iwaghamun di raraate inimale muun iwaghamun nditimbudi.

ve anjela to irabrab tamtoghon, irab di timatmaat.
Nam 14:2-37

¹¹ Mbeb naol to tivot pa yes Israela pa sawa tone-
nen, nene tinim patanjaan pait. Timbood kamos
to mbeb tonowen, leso ipatoot iit to aazne tavot
pa sawa to Maaron ipasob mbeb to naol ne, ve
tagharaat tauud. Pa vene, patanjani igham ghiit
inimale muun igham yes Israela. *Ro 13:11; 1Pe*
4:7

¹² Tovenen ighaze tamtoghon eta inumeer tau
ighaze iyoon tunja, ye irau ipatumi. Pa vene, itap
ve igham sosor. *Ro 11:20*

¹³ Sa tovaan to ighaze ivot payam, nene tovaan ite
maau. Tovaan tiam to naol ne, raratedi tinimale
tovaan to moghon moghon ivotvot pa tamtoghon
tisob. Ve yam irau anumeer Maaron. Pasa, tovaan
to yam irau ambaada maau, nene ye irau ipuli
ivot payam maau. Ve ighaze ipul tovaan eta ivot
payam, nene pale ighur lemim ataam eta leso
apaghau taumim pani ve ayoon ariana, ve alib pa
tovaan tonenen. *1Kor 1:9; 1Tes 5:24; 2Pe 2:9*

*Taneep saguan pa maaron kaaromja toman ru-
mai todi*

¹⁴ Tovenen yam ndiran tiou, ngar to tambees
pa maaron kaaromja, agharai malep. Aneep
saguan pani. *Mbanj 15:20; 2Kor 6:16+; 1Yo 5:21*

¹⁵ Yam lemim ngar. Tovenen taumim irau angabiiz
saveen to naghaze nasavia.

¹⁶ Sawa to taghun vaen ila rubruub, ve tapait
Maaron pa poia toni, nene igham ghiit talup
toman Krisi, ve sinj toni inim leed. Ve mberet to
tateeva ve taghani, tovene paam. Nene igham

ghiit talup toman Krisi, ve minda inim leed. *Mk 14:22+*

¹⁷ Ve mberet ee moghon to iit tasob taghani, tauto ipatoon ghiit ighaze iit tasob tanimale ngeu ee moghon anoņa. Nene Krisi. *Yo 6:33+; Ro 12:5; 1Kor 12:13,27*

¹⁸ Matamim ingal ngar to yes Israela titaghoni pa watoonrau todi. Ighaze tigham mbeb eta inim watoonrau, nene timoz pida izala artaal, ve taudi tighan pida, leso yesņa Maaron tilup di tinim ee moghon. *Wkp 7:15*

¹⁹ Ighaze tovene, pale tasaav vena pa maaron kaaromņa ve watoonrau to tamtoghon tighamgham padi? Nene mbeb tau? Maau. Maaron toit moghon to Maaron tau. *1Kor 8:4+*

²⁰ Watoonrau to yes to tikankaan pa Maaron tighamgham di ila rumai todi lolo, nene tigham di pa Maaron tau maau. Tigham di pa avuvu samsamiadi. Tovenen you naghaze yam ala toman di pa ngar todi tonowen malep. Pasa, ighaze ala toman di, nene inimale yamņa avuvu samsamiadi tonowen alup gham anim ee moghon. *Lo 32:17; Syg 9:20*

²¹ Aloon. Yam irau aghun ila rubruub to Tiina toit, ve rubruub to avuvu samsamiadi paam ne maau. Ve yam irau aghan ila ton to Tiina toit, ve aghan ila ton to avuvu samsamiadi paam ne maau. *2Kor 6:15+*

²² Ighaze iit tagham tovene, nene pale tagham Ngeu Tiina ate yabyab kat. Pasa, ngar toni iyaryaan ighaze taghur lolood ve ngar toit isob ila pani moghon. Yam to aghanghan ve aghunghun ila rumai to maaron kaaromņa, agham ngar vena?

Aghaze tapiriid ilib pa Maaron? *Lo 32:21; Mbo 78:58*

Iit irau tagham ngar to iuul nditaad ve ipait Maaron iza

²³ Tiam pida tisaav tighaze: “Yei irau nigham ngar to naol ne. Mbeb eta le ngalsekiinj maau.” Eemoghon ngar tisob tiuul ghiit maau. Ve ngar tisob tipalot ghiit maau. *1Kor 6:12*

²⁴ Iit irau tagham ngar pa tauud moghon maau. Iit irau tagham ngar pa nditaad paam, ve tatoova pa tauul di ve tapalot di pa ghurla todi. *Ro 15:1+; 1Kor 13:5; Pil 2:4+*

²⁵ Tovenen yam ataghon ngar tovene: Ighaze aghita mbeb eta minda ineep ila nal ina, yam aghason pani malep. Agholi ve aghani moghon. Agham ngar naol malep. *1Tim 4:4*

²⁶ Pasa, Maaron aliņa isaav ighaze:

“Taan toman mbeb tisob to tineep ila, nene to Ngeu Tiina.” *Mbo 24:1*

²⁷ Ve ighaze tamtoghon eta ighur ila to Krisi maau, ve ipoi gham pa ghanghaniinj, ve lolomim aghaze ala, nene poia. Ala lak. Ve sa aniiņ to ighaze tigham payam, yam aghani moghon. Aghason di pani malep. Pasa, ighaze tipaes payam tighaze mbeb tonenen inim pa rumai to maaron kaarom eta, ve aghani, nene pale agham ngar aghaze asosor ila Maaron mata. *Lu 10:7+*

²⁸ Eemoghon ighaze tamtoghon eta ipaes payam ighaze mbeb minda tonenen, nene watoonrau suruvu, ghoru yam aghani malep. Pasa, ighaze aghani, nene pale tamtoghon tonenen ighita ighaze yam agham sosor, ve igham ngar naol. *1Kor 8:7+*

²⁹ Onoon, ighaze aghan mbeb tonenen, yam pale ayamaan taumim aghaze agham sosor ila Maaron mata maau. Eemoghon yam irau agham ngar pa itamim tonenen. Ighaze ighita gham aghan mbeb tonenen, nene pale ighita ighaze yam agham sosor, ve igham ngar naol. Eemoghon ighaze tamtoghon eta isavia saveeŋ tovene pait maau, iit irau tataghon tauud gabizooŋ toit pa sa mbeb to poia ve samia. Pughu vena to nataghon gabizooŋ to ŋgeu ite? *Ro 14:14+*

³⁰ Ighaze you naghan mbeb tonenen toman lolog poia pa Maaron, pughu vena to tamtoghon ite iyou avo payou? *Ro 14:6; 1Tim 4:3+*

³¹ Tovenen ighaze yam aghan, ma aghun, ma agham sa ngar ite paam, nene poia. Eemoghon sa ngar to aghami, yam irau aghami pa apait Maaron iza. *Kol 3:17; 1Pe 4:11*

³² Tovenen yam irau agham ngar pa yes Yuda, ve yes Grika to tighur ila maau ne, ve lupuuŋ to Maaron paam. Agham ngar eta to pale ireu ngar todi malep. Agham ngar to denja moghon ila tamtoghon tisob matadi. *Ro 14:13+; 1Kor 8:13; 2Kor 6:3*

³³ Leso ataghon ngar tiou. Aghita. You naghham ngar pa taug maau. Sawa isob, natoova pa naghham ngar to popoia moghon ila tamtoghon tisob matadi. Ve naghham ngar to pale iuul di, lesu Maaron igham mulin di. *Ro 15:2; 1Kor 9:19+*

11

¹ Tovenen yam irau ataghon ghou pa ngar tiou, inimale you nataghon Kriŋi pa ngar toni. *1Kor 4:16+; Pil 3:17; 2Tes 3:7+*

Tagharaat tauud vena pa sawa to sunjuun?

² You napait gham pa ngar tiam to sawa isob matamim ingalngal ghou, ve akis Maaron aliņa to nasavia payam ne ariņa. Saveeņ tonenen, you naghami ila to tamtoghon pida, ve anag nasakia ilat tiam. *2Tes 2:15; 2Tim 1:13+*

³ Ve aazne, naghaze yam awatag kat tovene: Krisi, ye inim daba pa nditamoot tisob, ve nditamoot tinim daba pa ndizwadi. Ve Maaron to inim daba pa Krisi. *Mbnp 3:16; Ep 1:22, 5:23; 1Pe 3:1,5*

⁴ Ighaze tamoot eta ipoon daba pa mbeb eta, ve isuņ ma ivotia Maaron aliņa pa tamtoghon inimale propet, nene ipamayanņin daba toni, nene Krisi.

⁵ Ve ndiliva to tipoon dabadi maau, ve tisuņ ma tivotia Maaron aliņa tinimale propet, nene yes tipamayanņin daba todi, nene ndizwadi.*

Ndiliva tovene tinimale ndiliva samsamiadi to tiin dabadi, lesu tipamayanņin di.

⁶ Tovenen ighaze liva eta ipakur tau ve ipoon daba maau, nene poia pa tiin daba. Leso maya pa ngar to ye ighami, ve ipuli. Ve ighaze liva eta maya pa tikot daba raua izi, ma tiin daba, ye irau ipoon daba.

⁷ Eemoghon nditamoot irau tipoon dabadi maau. Pasa, yes tigham Maaron nagho, ve tineep

* **11:5:** Yes Korin ngar todi tovene: Ighaze ndiliva tipoon dabadi, nene ipatoonņ di ighaze yes ndiliva popoiadi to tineep ila ndizwadi sambadi. Ve ighaze liva eta ipoon daba maau, nene ipatoonņa ighaze ye nasolo tidi, ve lolo pa ineep ila azuwa samba maau. Grika tidi ledi ataam ru to tipoon dabadi. Eez, nene tikau uli pida ila dabadi inimale guduunņ. Ve ite, nene tipul dabadi raua itub tiina, ve timbuula ve tipoosa izala dabadi.

pa tipait Maaron iza ve tipatoon tapiri ve poia toni. Ve ndiliva tineep pa tipait ndizwadi. *Mbnp 1:26+*

⁸ Aghita. Muun kat, tamoot ivot ila to liva maau. Liva ivot ila to tamoot.

⁹ Ve Maaron igham ngar pa liva ve ighur tamoot ne maau. Ye igham ngar pa tamoot, tauto ighur liva pa iuuli. *Mbnp 2:18+; 1Tim 2:13*

¹⁰ Pughu tonene to yes ndiliva irau tipoon dabadi. Leso tipatoon taudi tighaze yes tineep ila ndizwadi sambadi, ve ngar todi denja ila yes anela matadi.†

¹¹ Eemoghon iit ndiliva ve nditamoot to taneep ila to Tiina toit Krisi, irau taneep leed leed maau. Nditamoot ve ndiliva irau tiwaulan di.

¹² Agham ngar pa Adam yesuru Eva. Papazogi, liva ivot ila to tamoot. Ve aazne, nditamoot tivotvot ila to ndiliva. Pasa, ndiliva to tipoop di. Eemoghon Maaron to inim pughu pa mbeb tisob.

¹³ Yam taumim irau angabiiz mbeb tonene. Ighaze alup gham pa sunuun, ve liva eta ipoon daba maau ve isun pa Maaron, nene denja?

¹⁴ Saveen tiou tonene itaghon iit gabuaad paam. Ighaze ngeu eta daba raua tiina, nene taghita taghaze ngeu tonenen ipamayanin tau.

¹⁵ Ve ighaze liva eta daba raua tiina, nene ighami paghuna ila tamtoghon matadi ve tipaiti. Daba raua tonowen, nene Maaron igham pani, lesu ipoon daba.

¹⁶ Ighaze tamtoghon eta izoor alinag tonene, nene you nasaav pani tovene: Yei lemai ngar ite

† **11:10:** Sawa to iit talup ghiit pa sunuun, yes anela tinepneep toman ghiit paam. Ughita Epesus 3:10 ve 1Pet 1:12.

paam pa mbeb tonene maau. Ve yei moghon maau. Lupuuj tisob to Maaron titaghon ngar ee moghon pa mbeb tonene.

Yes Korin tiwaghamun ngar to ghaniin pasa

¹⁷ Yo, naghaze napasalungan gham pa ngar tiam pida to denjadi maau. Irau napait gham maau. Pasa, sawa to alup gham pa sunjuuj, sunjuuj tiam iuul gham maau. Iwaghamun gham.

¹⁸ Saveej to naghaze nasavia payam muuj, nene vene: You naloon varumim tighaze sawa to alup gham pa ghanghaniin ve sunjuuj, yam avalag gham aneep lemim lemim, ve awazoran gham pa savsaveej. Ve naghaze saveej tonene, avaat onoon. *1Kor 1:10+, 3:3*

¹⁹ Ngar tiam to avalag gham aneep lemim lemim, poia maau. Eemoghon ngar tovene irau ivot. Leso tawatag: Sei masin to Krisi tamtoghon toni kat, ve ngar todi denja ila mata. *1Yo 2:19*

²⁰ Sawa to alup gham pa sunjuuj, yam ataghon ghanghaniin to Tiina toit ngara maau.

²¹ Pasa, yam agham ngar pa nditamim ve asaan di maau. Yam pida matamim ghanghaniin, ve amuuj ala agham amim amim ve aghan. Ve tamtoghon tiam pida tighun tiina le tisami. Tauto nditamim pida to tinim muri, adi aniin maau ve pitool di.

²² Vena, irau aghan ve aghun izi taumim ruum tiam maau? Ma aghaze aveleg lupuuj to Maaron ve apamayanin nditamim pida to mbolaanja ne? Pale nasaav vena payam? Aghaze napait gham pa ngar tiam tonanan? Maau kat! *Yems 2:5+*

*Paulus ipit saveeņ to pasa muul
(Mt 26:26+; Mk 14:22+; Lu 22:17+)*

²³ Saveeņ to naghami ila to Tiina toit ve muuņ nasavia payam, tauto aazne nasavia muul. Saveeņ tovene: Mboņ to Yudas ighur Yesu ila koia nimadi, Yesu igham mberet,

²⁴ ve ipait Maaron pani. Ghoru iteeva ve isaav ighaze: “Nene you mindag. You pale napul taug namaat payam. Ngar to naghami ne, matamim kisini ve ataghoni. Leso matamim iņgal ghou.”

²⁵ Tighan le isob, ghoru itaghon ngar raraate pa rubruub vaen. Ighami ve isaav padi ighaze: “Rubruub tonene, nene siņ tiou to pale imaliņ ve ipariaaņ saveeņ mbuaaņ to ataam paghu to pale Maaron yesņa tamtoghon toni tilup di tinim ee moghon. Sawa isob to ighaze yam aghun ila rubruub tonene, ghoru ataghon ngar to you naghami ne, lesu matamim iņgal ghou.” *Igham 24:3+; Hib 8:8+, 9:15+*

²⁶ Saveeņ tonenen, ngara tovene: Sawa isob to aghan mberet tonenen ve aghun ila rubruub vaen, yam avotia mateeņ to Tiina toit. Yam irau agham tovene ila ila le irau mulaaņ toni.

²⁷ Tovenen tamtoghon to ighaze ighan mberet ve ighun ila rubruub to Tiina toit, ve igham ngar to denja pa ngar to pasa maau,[‡] nene ye igham sosor pa Tiina toit minda ve siņi.

²⁸ Tovenen tamtoghon irau tiņgabiiz poian taudi, ghoru tighan mberet ve tighun ila rubruub. *2Kor*

[‡] **11:27:** Yes Korin tigham ngar naol to denja pa ngar to pasa maau. Pasa, sawa to tighan pasa, yes tilup lolodi inim ee moghon maau. Tivalag di tineep ledi ledi, ve tiveleg nditadi pida to mbolaņa.

13:5

²⁹ Pasa, mberet ve vaen, nene iza to Tiina toit anona. Tovenen ighaze tamtoghon eta ighilaal mbeb tonene maau, ve ighani ma ighuni inimale mbeb sorok, nene ye igham solor. Tamtoghon tovene, Maaron pale ighur atia pani.

³⁰ Pughu tonene to tamtoghon tiam katindi timomoroon ve tapiridi isob. Ve pida, timaat wa.

³¹ Ve inimale tanjabiiz tauud pooi ve taghan pasa, tone Maaron irau ighur atia tovene pait maau.

³² Eemoghon ighaze ye ingabiiz ghiit ighaze tagham solor, ve ilos ghiit pa ipasalungan ghiit, nene poia. Pa vene, takis ngar samia toit, ve sawa to Mbonj Muri, ye ighur atia pait, ve itinja ival tiina to taan talaleed. *Mbo 94:12+; 2Kor 7:10; Hib 12:7+; Syg 3:19*

³³ Tovenen yam tonvetaz tiou, ighaze alup gham pa ghanghaniin ve sunuun, asanan nditamim ve yam asob aghan raraate.

³⁴ Ve ighaze tamtoghon eta pitool matini, nene poia pa ighan pataghaan izi ruum toni. Le isob, ghoru ilat pa lupuun tiam. Leso sawa to alup gham, agham solor ila Maaron mata sob, ve ye ighur atia payam malep. You leg saveen pida inepneep sone. Eemoghon irau nasavia aazne maau. Taug nalat peria, ghoru nasavia.

12*Maaron Avuvu irei uraat ve ngar naol naol pait*

¹ Yam tonvetaz, uraat ve ngar naol naol to Maaron Avuvu irei di pait ne, you naghaze yam akankaan padi malep.

² Matamim ingal imuul ila pa muun, sawa to yam akankaan pa Maaron. Sawa tonenen, tiweu gham ala, ve asunsun pa maaron kaaromņa to tisavsav maau. *Mbo 115:4+; 1Tes 1:9*

³ Tovenen you naghaze nasaav ghazonņa payam tovene: Tamtoghon to Maaron Avuvu igham pooz pani, ye irau ipiyaav saveen samia inarua Yesu maau. Ve tamtoghon eta irau isaav sorok ighaze: “Yesu, ye Tiina” ne maau. Maaron Avuvu igham pooz pani, ghero isaav tovene toman lolo. *Mt 16:17; 1Yo 4:2+*

⁴ Maaron Avuvu ireirei uraat ve ngar naol naol pait. Uraat ve ngar tisob tonowen, nene Avuvu ee moghon to inim pughu padi. *Ro 12:6+; Ep 4:11+; Hib 2:4*

⁵ Iit tataghon ataam naol pa Mbesoon to it taghon ataam naol. Eemoghon tasob tambees pa Tiina ee moghon, nene Yesu.

⁶ Ve Maaron ee moghon to ipapalot ghiit tasob, tauto taghamgham uraat naol naol ila ye tau tapiri.

⁷ Maaron Avuvu ineep toman iit tasob, ve ireirei tau tapiri toman uraat ve ngar naol naol irau ghiit, leso tapalot lupuun to Krisi pani. *1Kor 14:26; 1Pe 4:10+*

⁸ Tamtoghon eez, Maaron Avuvu ipaghazonņani pa Maaron ngar toni, leso ivotia ngar tonowen pa tamtoghon. Ve ite, Maaron Avuvu igham le ngar popoia pida, leso ipatoot tamtoghon pani.

⁹ Ve ite, Maaron Avuvu ee moghon to ipalot ghurla toni le iyaryaņ kat. Ve ite, Maaron Avuvu igham le tapiri, leso iuul moroghoonņa ve tinidi popoia. *Mk 16:17+; 1Kor 13:2; Yems 5:14*

¹⁰ Ve ite, ye le tapiri to igham mbeb ghara-toonadi tivot. Ve ite, ye ivovotia Maaron aliņa pa tamtoghon inimale propet. Ve ite, ye irau ighilaal mbeb to tivotvot: Maaron Avuvu inim pughu padi, ma avuvu ite paam? Ve ite, Maaron Avuvu ipamundigini ve iwasavsav. Tauto tamtoghon tiloon saveen toni, eemoghon tikankaan pa pughu. Ve ngeu ite, Maaron Avuvu ipagha-zonani pa saveen tonowen pughu, leso ivotia pa tamtoghon ve tighazon panı. *Ro 12:6; 1Kor*

13:1-2, 14:2+

¹¹ Ngar ve uraat naol tonowen, Avuvu ee moghon to inim pughu padi. Ye ireirei di irau iit enaenā itaghon tau lolo. *Hib 2:4*

Iit to taneep ila lupuun to Krisi, tanimale Krisi anona pida pida

¹² Iit tawatag: Anonaaad, nene ee moghon. Ve ye le babaņa naol inimale nimaad, agheed, mataad, ve mbeb pida paam. Eemoghon anonaaad babaņa to naol ne, tilup di tinim mbeb ee moghon. Lupuun to Krisi, nene ngara raraate. *Ro 12:4+; 1Kor 10:17*

¹³ Aghita, iit tamtoghon naol naol. Pida, yes Yuda, pida Grika. Pida, mbesoonā. Ve pida, mbesoonā maau. Tinjin taudi. Eemoghon sawa to tagham ya, ila uraat to Maaron Avuvu ee moghon, iit tanim Krisi le. Ve Avuvu tonowen ilup ghiit tanim Krisi anona ee moghon. Ve Maaron igham Avuvu ee moghon pa iit tasob. Avuvu tonowen inim ya mata yaryaara pait ve ipapalot ghiit. *Yo 7:37+; Ga 3:28; Kol 3:11*

¹⁴ Iit tawatag: Anonaaad, babaņa ee moghon maau. Ye le babaņa katindi.

15 Aghita. Ighaze tamtoghon eta aghe igham ngar ighaze: “You nanim ngeu tonene nima, ghoru poia. Eemoghon maau. Tauto irau nalup toman anonja maau.” Pale irau ipul ina, ve ila ineep sagan? Maau. Pasa, ye ngeu tonenen anonja pida.

16 Ve ighaze ngeu tonenen taliņa igham ngar ighaze: “You nanim ngeu tonene mata, ghoru poia. Eemoghon maau. Tauto irau nalup toman anonja maau.” Pale irau ipul ina, ve ila ineep sagan? Maau. Pasa, ye ngeu tonenen anonja pida.

17 Ve vena? Ighaze anonjad babaņa tisob titoor di tinim mataad moghon, pale irau taloon saveen? Ma ighaze titoor di tinim taliņaad moghon, pale irau tayaaz mbeb vuzi? Maau.

18 Iit anonjad venen maau. Maaron itaghon tau lolo, ve ighur anonjad babaņa to naol ne, lesa tigham uraat todi todi.

19 Aghita. Ighaze anonjad babaņa tisob titoor di tinim babaņa eta moghon, pale taghita taghaze nene tamtoghon anonja? Maau.

20 Anonjad, ye le babaņa katindi. Ve babaņa tisob tilup di tinim mbeb ee moghon.*

21 Tovenen mataad irau iveleg nimaad ve isaav ighaze: “Ah, you leg uraat eta payom maau!” Isaav vene malep. Ve dabaad tovene paam. Irau isaav tovene pa agheed maau. Pasa, anonjad babaņa tisob, ledi uraat.

22 Ve agham ngar pa mbeb pida to tineep ila lolood inimale ateed ve kodkodaad. Onoon,

* **12:20:** Saveen to Paulus isavia pa anonjad, nene iza to lupuun to Krisi. Pasa, Maaron Avuvu ilup Krisi tamtoghon toni tinim ee moghon, ve ireirei uraat ve ngar naol naol irau di, lesa tipalot lupuun to Krisi.

taghita mbeb tonowen taghaze arianaadi maau. Eemoghon ledi uraat tintina. Ighaze tineep maau, nene pale tamaat.

²³ Anonaad babana pida to taghaze popoia pa tamtoghon tighita di maau ve mayaad padi, nene tapakur di. Pasa, moghon moghon mataad ingalngal di, ve taponpoon di.

²⁴ Eemoghon anonaad babana pida to popoia pa tamtoghon tighita di, nene tagham ngar tovene padi maau. Tapul di tineep sorok. Maaron ighur anonaad babana to naol ne, ve ilup di tinim ee moghon. Ve anonaad babana pida to taghita di taghaze mbeb sorok ve ledi izadi maau, nene ye ipait di tilib pa anonaad babana pida.

²⁵ Maaron igham tovene, leso anonaad babana tiwazoran di ve tivalag di sob. Ye ighaze tilup di tinim ee moghon, ve matadi pa taudi ve tiwaulan di.

1Kor 1:10-12

²⁶ Iit tawatag: Ighaze anonaad babana eta iyamaan yabyabuun, nene pale anonaad isob iyamaan yabyabuun. Ve ighaze tipait anonaad babana eta, nene pale anonaad babana tisob lolodi poia ve tinidi iza.

²⁷ Lupuun tiam, nene inimale Krisi anona. Ve yam asob animale anona tonenen babana pida. *Ro 12:5+*

²⁸ Lupuun to Krisi, Maaron ighur yes mbanooja pa timuun pani, ghoros yes to tinim propet ve tivotia Maaron aliya pa tamtoghon. Ve inim tol pani, nene yes to tipatoot tamtoghon pa Maaron aliya. Ghoros yes to tighamgham mbeb gharatoonadi, ve yes to Maaron irei tapiri padi leso tiuul moroghoona, ve yes to tighamgham uraat pa ulaan

nditadi, ve yes to ledi n̄gar pa n̄giniin̄ uraat, ve yes to Maaron Avuvu ipamundigin di ve tiwasavsaav.

Ep 2:20, 4:11+

²⁹ Vena? Tamtoghon tisob tinim mban̄oona to Kriſi? Ma tisob tinim propeta ve tivotia Maaron aliŋa pa tamtoghon? Ma tisob tipatoot tamtoghon pa Maaron aliŋa? Ma tisob tigham mbef ghara-toonaadi?

³⁰ Ma Maaron irei tapiri pa tamtoghon tisob leso tiuul moroghoona? Ma Maaron Avuvu ipamundigin tamtoghon tisob, leso tiwasavsaav? Ma irau tisob tivotia saveeŋ tovene pughu? Maau.

³¹ Tovenen Maaron Avuvu irei uraat ve n̄gar naol naol pait. Ve yam irau azuaria gham pa ghamuun̄ uraat ve n̄gar to iuul katin lupuun̄ to Kriſi. Yo, naghaze nasavia n̄gar eez to poia kat ilib pa n̄gar to naol ne.

1Kor 14:1

13

N̄gar to lolood pa tamtoghon, nene ilib pa n̄gar to naol

¹ Ighaze you irau nasaav ila ndug ndug aliŋadi, ma aŋela aliŋadi, eemoghon lolog pa tamtoghon maau, nene you nanimale belo ma ambam to itaŋ sorok toman aliŋa tiina.

² Ve ighaze navotia Maaron aliŋa pa tamtoghon nanimale propet, ve naghazoon̄ pa n̄gar toni yon̄gaan̄ isob, ve nawatag katin n̄gar popoia tisob, ve ghurla tiou iyaryaan̄ kat le irau nasaav moghon, ve lolooz tinduur tighau tila, nene poia. Eemoghon ighaze lolog pa tamtoghon maau, nene you nanim mbef sorok. *Mt 17:20; 1Kor 12:8+,28*

³ Ve ighaze narei mbeb tiou tisob pa yes mbolaanja, ve napul taug nala Maaron koia nimadi, ve tighur ghou nala yab ighan ghou, eemoghon lolog pa tamtoghon maau, pale naghama sa inim leg atia? Mbeb eta maau.

⁴ Ngar to lolood pa tamtoghon, nene vene: Tagham poian tamtoghon, ve ighaze tigham patañani pait, nene pale tatatan tauud, ve tambaada moghon. Ve ighaze taghita nditaad ledi mbeb katindi, nene irau ireu lolood maau. Ve tapait tauud ve taghaze talib pa nditaad maau.

1Pe 4:8

⁵ Ve tagham ngar eta isosor ila tamtoghon matadi maau, ve mataad ingal tauud moghon maau. Ve ateed yabyab soroksorok maau, ve mataad kisin sosor to tamtoghon maau. *Ro 13:10; 1Kor*

10:24,33; Pil 2:4

⁶ Ve ngar to ighaze denja maau, nene pale tiniid iza pani maau. Ve sa saveej ma ngar to onoon, nene pale lolood poia pani. *Mbo 15:2+; Ro 12:9; 1Pe 1:22; 3Yo 3-4*

⁷ Ve sa ngar to ighaze ivot, nene irau tapul muriid pa tamtoghon maau. Sawa isob, iit pale tanumeer Maaron, ve taghur ila arianja taghaze ye pale igham mbeb tisob tivot pooi. Ve sa patañani to ighaze ivot pait, nene pale tayoon arianja ve tambaada. *Ro 15:1; Ga 6:2; 2Tim 2:24*

⁸ Ngar to lolood pa tamtoghon, nene irau isob maau. Inepneep irau sawa isob. Eemoghon ngar to votiaan Maaron aliña inimale propet, muri pale Maaron ipasobi. Ve ngar to Maaron Avuvu ipamundigin ghiit ve tawasavsaav, nene pale isob. Ve uraat to Maaron Avuvu ighamghami, lesa ipagha-

zonjan ghiit pa ngar pida, nene paam pale isob.

⁹ Aghita. Iit tagham ngar iraua sone. Ve Maaron aliņa to tavotia pa tamtoghon tanimale propet, tovene paam. Tasavia pida pida moghon. *1Kor 8:2+*

¹⁰ Ve tala tala le ighaze sawa to mbeb anoņa kat ivot, nene pale Maaron ipasob ngar tisob to aazne tagham pida, ve pida taghami sone ne, ve tilaledi. *Ep 4:13; Pil 3:12*

¹¹ Muuņ, sawa to pain ghou, saveeņ toman ngar ve gabizooņ tiou, nene inimale to ndipain. Eemoghon aazne, nanim olman, ve ngar tiou imatu wa. Tauto napul ngar to ndipain ineep.*

¹² Aazne, iit taghita mbeb to Maaron ighazooņ kat maau. Nene inimale taghita mbeb tonowen anunudi ila tirooņ to ņgalaanņa maau. Eemoghon muri, itiņa Maaron pale tawaghiton ghiit. Aazne, naghām ngar pida moghon. Ve muri, you pale nawatag kat, inimale Maaron iwatag katin ghou. *2Kor 3:18; 1Yo 3:2; Syg 22:4*

¹³ Tovenen ngar tintina tol to tinepneep: ngar to ghurla, ngar to ghuruuņ mataad pa Maaron, ve ngar to lolood pa Maaron ve tamtoghon. Ve ngar tol tonene, ngar to imuuņ, nene ngar to lolood pa Maaron ve tamtoghon. *Kol 1:4+; 1Tes 1:3, 5:8; 1Yo 4:16*

* **13:11:** Paulus isavia saveeņ tonene iza to tau. Eemoghon saveeņ tonene iņarua yes Korin. Pasa, ngar naol to yes Korin tighamgham di, nene ipatooņ di ighaze tigham ngar to Krisi iraua sone (1Kor 3:1). Paulus ighita ighaze ngar to lolood pa Maaron ve tamtoghon, tauto mbeb tiina kat. Ilib pa ngar to naol. Eemoghon yes Korin titaghon ngar tovene iraua sone.

14

Ngar to votiaaŋ Maaron aliŋa inimale propet, nene ilib pa ngar to Maaron Avuvu igham ghiit tawasavsaav

¹ Tovenen yam azuaria gham pa ngar to lolood pa Maaron ve tamtoghon, toman ngar ve uraat tisob to Maaron Avuvu irei di pait ne. Ve ngar eez to yam irau azuaria gham pani kat, nene ngar to tavotia Maaron aliŋa pa tamtoghon tanimale propet.

² Pasa, tamtoghon to Maaron Avuvu ipamundigin di ve tiwasavsaav, yes tisavsaav pa tamtoghon maau. Tisavsaav pa Maaron. Ve saveeŋ to tisavia, nene pughu iyooŋ. Tauto tamtoghon tilooŋa ve tikankaan pani.

³ Eemoghon yes to tivotia Maaron aliŋa tinimale propet, tisavia saveeŋ to tamtoghon irau tilooŋa ve tighazooŋ pani. Tauto tipalot nditadi ve tiseeŋ ngar todi, ve tirab atedi leso lolodi poia, ve tipari-aan di pa titaghon ngar poia.

⁴ Tamtoghon to Maaron Avuvu ipamundigini ve iwasavsaav, ye ipalot ival tiina maau. Ipalot tau moghon. Ve ighaze ngeu eta ivotia Maaron aliŋa inimale propet, ye ipalot yam asob to aneep ila lupuuŋ to Krisi, ve iseeŋ ngar tiam.

⁵ You naghaze Maaron Avuvu ipamundigin gham asob ve awasavsaav, ghoroo poia. Eemoghon ighaze yam asob avotia Maaron aliŋa pa tamtoghon animale propet, nene pale poia kat. Tovenen ighaze Maaron Avuvu ipamundigin tamtoghon eta ve iwasavsaav, ye irau ivotia saveeŋ tonenen pughu paam. Leso ipalot lupuuŋ to Krisi ve iseeŋ ngar todi. Ve ighaze maau, nene uraat

to votiaan Maaron aliņa pa tamtoghon inimale propet, to poia kat le ilib pa ngar to Maaron Avuvu ipamundigin ghiit ve tawasavsaav. *Nam 11:26-29*

⁶ Yam tonvetaz, ighaze you nalat, ve Maaron Avuvu ipamundigin ghou ve nawasavsaav, nene pale nauul gham vena? Maau. You irau navotia mbep pida to Maaron ipaghazonan ghou pani, ma naseen ngar tiam pa ngar pida, ma napatoot gham pa ngar pida, ma navotia Maaron aliņa payam nanimale propet, ghoru nauul gham. Pasa, ighaze nasavia saveen tovene, yam pale aghazon pa pughu.

⁷ Agham ngar pa mbep pida to tigharaat di lesu titan, inimale sab ve gita. Mbep tonowen, taudi irau titan maau. Tavib di, ma tarab di, ghoru titan. Eemoghon ighaze titan pooi maau, nene pale tawatag mboun aliņa vena?

⁸ Ve tavuur to tivibi pa malmal ne paam, ighaze itan pooi maau, nene pale sei igharaat tau pa malmal?

⁹ Yam tovene paam. Ighaze awasavsaav ve asavia saveen to tamtoghon tighazon panu maau, nene pale tigham ngar pa saveen pughu vena? Maau. Saveen tiam pale inim yaghur.

¹⁰ Onoon, tamtoghon to tineep izi taan ne, aliņadi naol. Ve aliņadi tonowen, tisob ledi pughudi. Tovenen sei to ighaze iwatag ndug eta aliņadi, nene pale ighazon panu.

¹¹ Eemoghon ighaze tamtoghon eta isavsaav, ve you nawatag aliņa maau, nene pale yeru niwaghinton ghei inimale ye to ndug ite, ve you to ndug ite.

¹² Yam tovene paam. Aazne, azuaria gham pa uraat ve ngar naol to Maaron Avuvu irei di pait.

Nene poia. Eemoghon yam irau azuaria gham kat pa uraat ve n̄gar to ipalot lupuuñ to Krisi.

¹³ Tovenen ighaze Maaron Avuvu ipamundigin tamtoghon eta ve iwasavsaav, ye irau ighason Maaron pa iuuli leso itoor saveeñ tonowen, ve ndita tilooña ve tighazooñ pa pughu.

¹⁴ Ighaze you nasuñ, ve Maaron Avuvu ipamundigin ghou ve nawasavsaav, nene Maaron Avuvu to ineep ila lolog, tauto isavsaav. Eemoghon saveeñ to nasavia, nene iuul n̄gar tiou maau.

¹⁵ Tovenen pale naghama vena? You pale nalup rugharu. Sawa pida to nasuñ, Maaron Avuvu to ineep ila lolog ne isavsaav. Ve sawa pida, nasuñ ve n̄gar tiou ighazooñ pa saveeñ to nasavia. Ve sawa pida to nambou mbouñ to sunjuuñ, Maaron Avuvu to ineep ila lolog ne imbou. Ve sawa pida, nambou ve n̄gar tiou ighazooñ pa mbouñ to namboui. *Ep 5:19; Kol 3:16*

¹⁶ Aghita. Ighaze tamtoghon eta ilat ilup toman gham pa sunjuuñ, ve Maaron Avuvu ipamundigin ghom ve upait Maaron pa poia toni toman lolom poia, ve tamtoghon tonenen ikankaan pa saveeñ tiom pughu, nene pale iyok pani ighaze: “Onoon” vena? Maau. Pasa, saveeñ to usavia, ye ikankaan pa pughu.

¹⁷ Onoon, yom usavia saveeñ poia ve upait Maaron pa poia toni. Eemoghon saveeñ tiom irau ipalot tamtoghon tonenen maau.

¹⁸ You lolog poia pa Maaron ve napaiti pasa, nawasavsaav le nalib pa yam asob.

¹⁹ Eemoghon sawa to naneep toman Maaron tamtoghon toni pa sunjuuñ, you naghaze nasavia

saveeŋ to tamtoghon tisob irau tilooŋa ve tighazooŋ pani. Ighaze nasavia saveeŋ waaro liim moghon to tamtoghon tighazooŋ padi, nene pale poia ve ilib pa saveeŋ waaro ndiŋndiŋ ndiŋndiŋ (10,000) to tamtoghon tikankaan padi.

²⁰ Yam torjvetaz, agham ŋgar inimale ndipain ŋgar geegeu muul malep. Yam anim ndolman wa. Tovenen yam irau agham ŋgar matua animale ndolman. Eemoghon ŋgar samia, ghoru aneep saganu pani animale ndipain geegeu. *Ro 16:19+; 1Kor 3:1; Ep 4:14+; Hib 5:12+*

²¹ Maaron aliŋa isaav tovene: Muuŋ, Maaron ate yabyab pa yes Israela, ve isaav padi ighaze:

“You pale naghama ndiran to ndug ite to aliŋadi ite, tinim ve tiŋgin tamtoghon tiou tonene, ve navotia aliŋag padi ila ndiran tonowen avodi. Eemoghon aliŋag to tisavia, yes Israela pale irau tilooŋa maau.” *Is 28:11+*

²² Saveeŋ tonene ipatooŋ ghiit ighaze ŋgar to tawasavsaav, nene inim ghilalooŋ pa yes to tighur ila ne maau. Nene inim ghilalooŋ pa yes to tighur ila sone, lesu ipamundigin ŋgar todi. Ve ŋgar to votiaan Maaron aliŋa inimale propet, nene inim ghilalooŋ pa yes to tighur ila sone ne maau. Nene inim ghilalooŋ pa yes to tighur ila, ve ipatooŋ di ighaze Maaron ineep toman di.

²³ Aghita. Ighaze alup gham pa sunuun ve yam asob awasavsaav, ve tamtoghon pida to tighur ila sone ve tikankaan pa Maaron, tilat ve tineep toman gham pa sunuun, nene pale tighita gham, ve tighaze yam awaghamgham animale borouŋa!

²⁴ Eemoghon ighaze tamtoghon eta tovene iloon ilat, ve iloon gham asob avotia Maaron aliņa animale propet, ve asavia saveen to ye ighazon panı, nene pale saveen tiam ingali, ve ighami ighilaal sosor toni ve atia to pale iza toni. *Yo 16:8; Mban 2:13*

²⁵ Tamtoghon tonenen pale iyamaana ighaze ngar isob to iyoon ila lolo, yam asavia ivot ighazon wa. Tovenen ye pale itap izi taan, ve ipait Maaron iza, ve isaav ighaze: “Onoon kat, Maaron inepneep toman gham.”

Ataam to sunuun ilaan denja

²⁶ Tovenen yam tonvetaz, pale tasaav vena? Sawa to alup gham pa sunuun, yam asob agham uraat le irau gham. Ngeu eez, ye imbou mboun pa ipait Maaron. Ve ite, ye ipatoot gham pa Maaron aliņa. Ve ite, ye isavia ngar yongaun pida to Maaron ipaghazonani panı. Ve ite, Maaron Avuvu ipamundigini ve iwasavsaav. Ve ite, ye ivotia saveen tonenen pughu. Ve sa ngar to aghaze aghami, yam irau aghami pa apalot lupuun to Krisi. *Ro 14:19; 1Kor 12:7+; Ep 4:12*

²⁷ Ighaze Maaron Avuvu ipamundigin tamtoghon ve tiwasavsaav, ival irau tisaav maau. Tamtoghon ru ma tol, nene iraua. Ve sawa to aghaze asaav, yam irau asanjan nditamim. Tamtoghon eez isavsaav le isob, ghoru tamtoghon ite ana. Ve tamtoghon eta irau ivotia saveen todi pughu, lesu ival tiina tighazon panı.

²⁸ Ve ighaze tamtoghon eta irau ivotia saveen todi pughu maau, nene irau tisaav aliņadi tiina

ila lupuuŋ to Krisi maau. Neneeŋadi moghon, ve tisavsaav toman Maaron ila lolodi.

²⁹ Yes to tivotia Maaron aliŋa tinimale propet, tovene paam. Tamtoghon ru, ma tol tisavsaav le isob, ghoru yam pida aŋgabiiz saveeŋ todi: Deŋia, ma maau? *Mbarŋ 17:11; 1Tes 5:20+; 1Yo 4:1*

³⁰ Ve ighaze tamtoghon eta isavsaav, ve tamtoghon ite ineep ve Maaron ivotia ŋgar eta pani, nene ye to isavsaav ne, irau neneeŋa ve ighur soso pa ita ite ana isavsaav.

³¹ Tovenen yam to avotia Maaron aliŋa animale propet, irau ataghon ŋgar tovene: Tamtoghon eez isavia saveeŋ toni le isob, ghoru ite ana isaav. Leso aseŋ ŋgar to tamtoghon tisob ve apalot di.

³² Aloŋ. Ighaze ŋgeu eta lolo ipamundigini ighaze ivotia Maaron aliŋa inimale propet, ye irau itatan tau, ve isanjan le ita ite ipasob saveeŋ toni, ghoru ana isaav.

³³ Pasa, Maaron toit, ye Maaron to ighamun mbab maau. Ye ighaze mbab tisob tilaan deŋiadi moghon. Ve ye ighaze iit tasob talup ghiit tanim ee moghon ve tataghon ŋgar luuma. Tamtoghon tisob to Krisi titaghon ŋgar tovene ila lupuuŋ todi todi.

³⁴ Ighaze yam alup gham pa sunuŋ, ndiliva irau tisaav maau. Yes irau neneeŋadi moghon, ve titatan taudi, ve tineep ila nditamoot sambadi itaghon tutuuŋ to Maaron. *Ep 5:22; Kol 3:18; 1Tim 2:11+*

³⁵ Ighaze ledi ghasoniin pida, sawa to tila ruum, ghoru tighason ndizwadi. Pasa, ighaze liva eta isaav ila lupuuŋ tiam lolo, nene igham

mayanjiina.*

³⁶ Laak, yam to azorzoor ghou ne, vena? Aghaze Maaron aliña ivot tiam muun, ghoru ila pa ndug pida? Ma aghaze yam moghon to Maaron aliña ilat ivot tiam?

³⁷ Alooŋ. Ighaze tamtoghon eta igham ngar ighaze ye propet to Maaron ve itaghon ngar to Maaron Avuvu, nene ye irau ighilaal ighaze saveeŋ to nambooda payam, nene tutuun to Tiina toit, ve iyok pani. *2Kor 10:7; 1Yo 4:6*

³⁸ Ve ighaze tamtoghon eta mata velegin saveeŋ tiou tonene, yam matamim ila pani malep.†

³⁹ Tovenen yam tonvetaz, azuarua gham pa ngar to votiaaŋ Maaron aliña pa tamtoghon inimale propet. Ve yes to Maaron Avuvu ipamundigin di ve tiwasavsav, yam aŋgalsekin di malep. *1Kor 12:31; 1Tes 5:20*

⁴⁰ Yam irau ataghon katin sunjuun ngara to naol ne, lesu sunjuun tiam denja moghon ve ilaan pooi.

15

Krisi imaat ve imundig pa mateeŋ wa

¹ Yam tonvetaz, you naghaze napei ngar tiam muul pa varu poia to navotia payam ve aghami wa. Varu poia tonene, to aazne ayondyood ila.

* **14:35:** Yes Grika tighita tighaze saveeŋ to ndiliva tisavia, nene mbep to ival tiina maau. Nene mbep to ndizwadi moghon. Saveeŋ waaro tonene, pughu ighazoon maau. Liva to isaav ila lupuun to Krisi lolo, ye igham mayanjiina pa sei? Igham mayanjiina pa tau, azuwa tamoot, ma lupuun to Krisi? † **14:38:** Ataam ite to tator saveeŋ tonene, nene vene: “Ve ighaze tamtoghon eta izoor saveeŋ tiou tonene, ye paam, Maaron pale izuruni.”

² Varu poia to muuᅇ navotia payam, ighaze aghur ila ve akisi tuᅇia, nene pale inim ataam payam ve Maaron igham mulin gham. Eemoghon ighaze akisi maau, nene pale inim mbeb sorok, ve aghita ghurla tiam anoᅇa maau. *Ro 1:16+, 11:22; Hib 3:14*

³ Saveeᅇ tiina kat to muuᅇ tisavia payou ve anag nasakia ilat payam, nene vene: Kriᅇi, ye igham inaad ve imaat pa sosor toit itaghon Maaron aliᅇa to timbooda. *Is 53:5+; Ga 1:4; 1Pe 2:24*

⁴ Ve titavia izila mateeᅇa inadi ve mboᅇ inim tol, ghoru Maaron ipamundigini pa mateeᅇ. Nene paam itaghon Maaron aliᅇa to timbooda. *Lu 24:46*

⁵ Sawa to imundig, ye ila ivot to Petrus muuᅇ. Ghoru ila ivot to mbaᅇooᅇa toni tisob ve tighita. *Mk 16:14; Lu 24:34+; Yo 20:19*

⁶ Muri ghoru, ye ila ivot to tamtoᅇhon toni irau 500 ve avua pida, ve tisob tighita. Ndiran tonowen, katindi tinepneep sone. Ve pida timaat wa.

⁷ Ghoru ivot to Yakobus* ve ighita. Ghoru ila ivot to mbaᅇooᅇa toni tisob. *Mbaᅇ 1:3+*

⁸ Yes mbaᅇooᅇa toni tisob tighita ve inim inim le muri ghoru, ivot tiou ve anag naghita paam, ve isob. Onoon, ataam to ye igham ghou nanim mbaᅇooᅇa toni, nene ite pa ataam to ye igham mbaᅇooᅇa toni pida. You nanim tamtoᅇhon to tina

* **15:7:** Yakobus tonene, nene Yesu tazi.

ipooa ila sawa toni kat maau.† *Mbanj 9:3+; 1Kor 9:1*

⁹ Mbanjoona tisob to Krisi izadi ilib payou. Onoon, you mbanjoona toni paam. Eemoghon naghita taug naghaze you poiag irau to tiwaat ghou tighaze mbanjoona to Krisi maau. Pasa, muuj, naghur patajani naol pa lupuuñ to Maaron. *Mbanj 8:3; Ga 1:13; 1Tim 1:13*

¹⁰ Eemoghon poia to Maaron itoor ghou, tauto nanim mbanjoona to Krisi ve aazne nataghon ngar toni. Poia toni iza tiou sorok maau. Ighur anoja. Pasa, you naghama katin uraat le nalib pa mbanjoona tisob. Eemoghon you taug maau. Poia to Maaron ineep tiou, tauto ipapalot ghou ve naghama naghama uraat tonene. *2Kor 11:5,23, 12:11+; Kol 1:29*

¹¹ Tovenen ighaze you, ma mbanjoona pida nivotia varu poia pa tamtoghon, nene yei nisob nisasavia saveenj tovene pa mateenj ve mundigiinj to Yesu Krisi. Ve saveenj tonene, tauto yam aloona ve aghur ila.

Maaron pale ipamundigin yes mateenja

¹² Yei nivovotia saveenj pa tamtoghon tovene: “Maaron ipamundigin Krisi pa mateenj wa.” Ighaze venen, pughu vena to tiam pida tighaze Maaron irau ipamundigin yes mateenja maau? *Mbanj 2:32+, 4:33, 5:30+*

† **15:8:** Sawa to Yesu ineepneep izi taan, mbanjoona toni pida tilaghaagh tomani. Tovenen tighita uraat toni ve mateenj toni paam. Ve sawa tonenen, Yesu ighur di tinim mbanjoona toni. Eemoghon Paulus, ye ilaagh toman di maau. Yesu imuul iza ila pa sambam, ve muri ghero, ivot to Paulus ve ighuri inim mbanjoona toni.

¹³ Aghita. Ighaze saveeñ todi onoon, ve mateeña irau timundig maau, nene Krisi paam, Maaron ipamundigini pa mateeñ maau.

¹⁴ Ve ighaze Maaron ipamundigin Krisi pa mateeñ maau, saveeñ to yei nivovotia, nene saveeñ sorok. Le anoña maau. Ve ghurla tiam paam, mbeb sorok.

¹⁵ Ve mbeb ite. Ighaze Krisi imundig pa mateeñ maau, nene yei tonene nigham kaarom payam pa Maaron iza. Pasa, nipariaañ tamtoghon pa tighur ila tighaze Maaron ipamundigin Krisi pa mateeñ. Eemoghon ighaze saveeñ tiam tonanan onoon, ve mateeña irau timundig maau, nene Krisi paam, Maaron ipamundigini pa mateeñ maau.

¹⁶ Nayol alinag muul. Ighaze saveeñ tiam onoon, ve mateeña irau timundig maau, nene Krisi paam, Maaron ipamundigini pa mateeñ maau.

¹⁷ Ve ighaze Maaron ipamundigin Krisi pa mateeñ maau, ghurla tiam, nene mbeb sorok. Le anoña maau. Ve sosor tiam inepneep sone.

¹⁸ Ve yes to tighur ila to Krisi ve timaat, yes paam tilaledi wa.

¹⁹ Iit taghurghur mataad pa mundigiin to yes mateeña ve nepoon poia to pale Krisi igham pait. Eemoghon ighaze saveeñ to nepoon tonowen, onoon maau, ve taghurghur mataad pani sorok, nene takaria tauud wa. Pasa, sawa to taneep izi taan, iit tambaad patañani naol. Tovenen tamtoghon avaat lolodi isamin ghiit ilib pa tamtoghon tisob to taan to tineep sami ne.

²⁰ Eemoghon maau! Maaron ipamundigin Krisi pa mateeñ wa. Ye inimale aniiñ mata to imatu ila uum muun. Pasa, ye to imuun pa mateeña tisob to

pale timundig. *Mbanj 26:23; Kol 1:18; 1Pe 1:3; Syg 1:5*

²¹ Aghita. Muuñ, ñgeu eez to inim ataam pa mateeñ ivot. Mundigiñ to yes mateeña tovene paam. Ngeu eez to inim ataam pani ve ivot. Nene Kri. *Mbnp 3:1-19; Yo 11:25; Ro 5:12+*

²² Iit tamtoghon to tavot ila to Adam, tasob taneep ila sosor toni lolo. Tauto iit tasob tamatmaat. Ve yes to tinim Kri le ve tineep tunja ila toni, tovene paam. Muri, Maaron pale ipamundigin di tisob, ve tineep matadi iyaryaar.

²³ Eemoghon tamtoghon tisob pale titaghon sawa todi todi. Kri to imundig pa mateeñ muuñ. Ve tala tala le sawa to ighaze ye imuul inim, ghoro tamtoghon toni tisob anadi timundig. *1Tes 4:15+*

²⁴ Mbeb tonowen isob, ghoro taan sawa ivot, ve ye pale ipasob yes pooza, ve daba tisob to izadi tintina, toman mbeb tisob to tapiridi tintina, le tisob tilaledi. Ghoro ipul uraat to ghamuun pooz imuul ila Tama Maaron nima.

²⁵ Pasa, Kri pale igham pooz itaghon Maaron ñgar toni le irau itatan koia ve tapiridi isob kat, ve ivazag di ila aghe samba. *Mbo 110:1; Mt 22:44; Hib 1:13*

²⁶ Ve koia to pale ipasobi muri kat, nene mateeñ. *Syg 20:14, 21:4*

²⁷ Maaron aliña to timbooda, isaav ighaze: “Maaron ighur mbeb tisob tineep ila ye samba wa.” Onoon, saveeñ tonene isaav ighaze mbeb tisob tineep ila Kri samba. Eemoghon Maaron, ye ineep ila Kri samba maau. Pasa, ye to ighur mbeb tineep ila Kri samba. *Mbo 8:6; Mt 28:18; Hib 2:8; 1Pe 3:22*

28 Muri, sawa to mbeb tisob tineep denjadi ila Natu samba, Natu pale ighur tau ila Tama Maaron samba. Leso Maaron inim daba pa mbeb tisob, ve ingin di.

29 Laak, naghaze naghason gham. Ighaze mateenja irau timundig maau, pughu vena to yam pida aghaze agham mateenja tiam inadi, ve tigham ya payam? Agham ngar tonanan pasa? Pale iuul di vena?

30 Ve pughu vena to sawa isob, yei nimbadaad patañani pa Kriisi iza, ve nireirei taumai pa ndaab. *Ro 8:36; 2Kor 11:26*

31 Yam tonvetaz, yam agham ghou lolog poia. Pasa, uraat tiou ighur anonja ivot ila lolomim ve anim Tiina toit Yesu Kriisi le wa. Ila ye mata, you nasaav ghazonja payam naghaze: Mateenja inajarua ghou irau sawa isob. *2Kor 4:10+*

32 Ighaze you nataghon ngar to tamtoghon moghon pa uraat to naghamsami ne, pughu vena to narei taug, ve yeinja mbeb sagsagna niparab izi ndug Epesus? You naghaze naghamsami sa kat, to nambaad patañani tonowen? Ighaze mateenja irau timundig maau, tambanja. “Taghanghan, taghunghun, ve takaal leed nepoon poia izi taan. Pasa, bozo ma mbonru, ghorotamatmaat.” *Mbanj 19:23+; 2Kor 1:8*

33 Yam apatum gham. Apul tamtoghon titombaan gham malep!

“Pasa, ighaze iit to tataghon ngar poia ne, talup toman ndiran samsamiadi, nene pale tiyes ghiit pa ngar todi, ve ngar toit isami paam.”

³⁴ Ngar tiam iwaghamgham iraua! Agham ngar pool, ve apul ngar samia ineepile, ve ataghon ngar to denja ila Maaron mata. You nasaav gha-zoonja payam: Mayamim. Pasa, yam pida awatag Maaron rita maau.

Anoŋaad papaghu pale ariŋadi, ve irau tisami maau

³⁵ Yo. Ngeu eta pale ighason ghou tovene: “Ighaze Maaron ipamundigin yes mateeŋa, pale ipamundigin di vena? Ve sawa to timundig, pale igham ledi anoŋadi papaghu to ghitoonadi vena?”

³⁶ Yom borou! Lem ngar maau! Ughita. Ighaze tavazog mbeb eta uve, nene pale uli imbuuz ve ilale, ghoru paghu toni itub iza. *Yo 12:24*

³⁷ Ve ighaze tavazog wit, ma mbeb ite paam uve, nene pale paghu toni to muri itub iza ne, ghitoonja raraate inimale uuv to tavazogi ne maau. Pale ghitoonja ite.

³⁸ Ve Maaron igham mbeb to tavazog di ne titub tiza, ghoru eŋaeŋa tighur ayadi, bogadi, rauadi, rungudi, ve anoŋadi itaghon ye tau ngar toni.

³⁹ Mbeb to tineep izi taan ne, mindadi raratedi maau. Iit tamtoghon mindaad ite, ŋgai todi ite, man todi ite, ve iigh tovene paam, mindadi ite.

⁴⁰ Ve mbeb to tineep ila sambam paroŋania ne, anoŋadi ite. Ve mbeb to taan, anoŋadi ite. Mbeb to sambam paroŋania paghunadi, ve mbeb to taan paghunadi paam. Eemoghon yes raratedi maau.

⁴¹ Ndag nguruba, nene ite pa kaiyo nguruba. Ve pitum tovene paam. Ngurubadi ite pa ndag ve kaiyo ngurubadi. Ve pitum tisob raratedi maau. Pitum eŋaeŋa ngurubadi ite ite.

⁴² Mundigiinj to yes mateenja, nene ngara raraate. Ighaze tamaat ve titavia ghiit, nene anoñaad izila taan ve imbuuz ve ilale. Eemoghon sawa to Maaron ipamundigin ghiit pa mateen, ye pale igham leed anoñaad papaghu. Anoñaad papaghu tonenen pale ariañadi, ve irau tisami maau.

⁴³ Anoñaad to titavia izila taan, nene ghitoonja poia kat maau. Eemoghon muri, sawa to Maaron ipamundigin ghiit pa mateen, ye pale igham leed anoñaad to popoia kat, ve ngurubadi tiina. Anoñaad to titavia izila taan, ye le tapiri maau. Eemoghon sawa to Maaron ipamundigin ghiit pa mateen, ye pale igham leed anoñaad papaghu to tapiridi tintina. *Mt 13:43; Pil 3:20+; Kol 3:4*

⁴⁴ Anoñaad to titavia izila taan, nene mbeb to taan. Eemoghon sawa to Maaron ipamundigin ghiit pa mateen, ila Maaron Avuvu tapiri, iit pale tagham leed anoñaad to sambam.

⁴⁵ Maaron aliñja to timbooda, isaav ighaze:

“Adam, ngeu to Maaron ighuri muun, imundig inim tamtoghon, ve mata iyaryaar.” *Mbnp 2:7*

Ve Adam ite to ivot muri,‡
ye avuvu to igham ghiit taneep mataad iyaryaar le alok. *Yo 5:21,24; Ro 5:15+*

⁴⁶ Tovenen ngeu to sambam imuun maau. Ngeu to taan toman taan nepoonja to imuun. Ghoru ngeu

‡ **15:45:** Adam ite to ivot muri, nene Krisi. Ves 47 iwaata ighaze: “Adam ite to inim ru pani.” Saveen tonene, ngara tovene. Adam to ivot muun, iit tasob tavot ila toni. Ye pughu toit. Tovenen sawa to ye igham sosor, iit taneep ila sosor tonowen lolo paam. Krisi tovene paam. Ye inim pughu pa lupuun paghu, nene tamtoghon toni. Yes to tinim Krisi le, tineep ila mateen ve mundigiinj toni lolo.

to sambam inim toman nepoon paghu to Maaron Avuvu.

⁴⁷ Adam to ivot muon, Maaron igharaata pa taan. Tovenen ye tamtoghon to taan. Ve Adam ite to inim ru pani, ye ineep sambam ve izi inim. *Mbnp 3:19; Yo 3:13,31*

⁴⁸ Tamtoghon tisob to taan, anonadi ve nepoonadi, nene tinimale ngeu to taan to Maaron ighuri. Ve yes to pale tineep izi ndug sambam, anonadi papaghu ve nepoonadi, nene tinimale Ngeu to ineep sambam ve izi inim.

⁴⁹ Aazne, nepoon toit, taneep tanimale ngeu to taan to Maaron ighuri. Ve muri tovene paam. Nepoon toit pale inimale nepoon to Ngeu to ineep sambam ve izi inim. *Ro 8:29+; 1Yo 3:2*

⁵⁰ Yam tonvetaz, you nasaav payam tovene: Anonaad to taan, nene irau igham nepoon to ndug sambam maau. Pasa, mbep to ndug sambam irau tisami maau. Tovenen mbep to isamsami inimale anonaad to taan, nene irau igham nepoon to ndug tonowen maau. Maaron igham leed anonaad papaghu, ghoru iit irau tagham nepoon tonowen. *Yo 3:5+*

Maaron igham ghiit talib pa mateen

⁵¹ Aloon. You naghaze napaghazonan gham pa mbep eez to muon iyoon ve aazne Maaron isavia ivot ighazon. Tamtoghon toit pida pale timaat maau. Pasa, sawa to Mbon Muri, Maaron pale itoor ghiit tasob, ve tagham anonaad papaghu.

⁵² Tavuur to Maaron ighuri pa itan muri kat, pale itan, ve rikia moghon Maaron ipamundigin yes mateenja, ve igham ledi anonadi papaghu to irau tisami maau. Ghoru iit to tamaat sone ve

tanepneep ne, anaad Maaron pale itoor ghiit, ve igham leed anonaad papaghu. *Mt 24:31; Pil 3:21; 1Tes 4:15+*

⁵³⁻⁵⁴ Pasa, anonaad to taan to tisami ve timatmaat, Maaron irau itoor di. Leso tinim paghu, ve irau tisami, ma timaat muul maau. Mbeb tonene ighaze ivot, nene pale Maaron aliņa waaro eez to timbooda, anona ivot. Isaav ighaze: “*Maaron iparab ariņa, tauto ilib pa mateeņ tapiri ve ipasobi le isob kat.*” *Is 25:8*

⁵⁵ “Mateeņ, tapirim to ulib payei ineeep sine?”

O mateeņ, iiz tiom to unġal ghei pani ne, ineeep sine? Maau.” *Hos 13:14*

⁵⁶ Pasa, iiz to mateeņ, nene ņgar samia. Ve ņgar samia ighamgham tapiri ila tutuun. *Mbnp 3:3; Ro 4:15, 5:12+, 7:9+*

⁵⁷ Eemoghon iit tapait Maaron toman lolood poia! Pasa, ila uraat to Tiina toit Yesu Krisi, Maaron igham ghiit talib pa ņgar samia ve mateeņ. *Ro 8:37; 2Kor 2:14; 1Yo 5:4+*

⁵⁸ Tovenen yam tonvetaz to lolog payam kat, you nasaav payam: Ayoon ariņa, akis ghurla tiam tunġia, ve apul taumim kat pa uraat to Tiina toit irau sawa isob. Pasa, yam awatag: Ighaze ye ineeep toman gham pa uraat tiam, yam arab taumim sorok pa uraat maau. Uraat tiam pale ighur anona. *Ga 6:8; Hib 6:10; Syg 14:13*

16

Paulus ipalot yes Korin pa tiuul nditadi to tineep izi Yerusalem

¹ Yo, you leg saveeņ ris payam pa yaam to ag-haze anġooga pa Krisi tamtoghon toni to tineep izi Yerusalem. You naghita naghaze ataam to

naghuri pa lupuun to Maaron to tineep izi taan suruvu to Galesia, yam ataghoni paam, ghero poia. *Mbanj 24:17; Ro 15:25+; 2Kor 8:1+*

² Wik to naol ne, ndag to ivot muun, yam enaena irau aghur yaam tiam pida ila sagan itaghon uraat tiam atia. Leso ivot inim tiina, ve isanan pa sawa to nalat. Ataghon alinag tonene, ghero poia. Pasa, ighaze nalat peria ve angooga sone, nene pale poia maau. *Mbanj 20:7*

³ Ve aghur tamtoghon tiam pida to aghita di aghaze tiraua, lesa tigham yaam to angooga ne ila to tonvetaz toit to tineep izi Yerusalem. Sawa to nalat, you pale nambood rau pida tinim paesiin padi, lesa tikis di ve tila.

⁴ Ve ighaze naghita naghaze poia pa you paam nala, nene pale yeina nila.

Paulus ipaesia laghoonj toni

⁵ You naghama ngar naghaze nala naghita nditaad pida to tineep irau taan suruvu to Masedonia. Tovenen you pale nala naghita di muun. Le isob, ghero nalat naghita gham.

⁶ Ve naghaze naneep toman gham mala ris. Tovenen matag ingal naghaze naneep toman gham le sawa to ndug yauna isob, ghero yam irau aghita ghou pa laghoonj tiou, ve aghur ghou nala pa ndug sine to naghaze nala pani.

⁷ Lolog pa nangig gham moghon ve nala maau. Tovenen ighaze Maaron lolo tovene, nene pale itina taneep mala ris.

⁸ Eemoghon irau nala Masedonia rikia maau. Pale naneep izi ndug Epesus le irau lupuun tiina to Pentekos ivot, ghero nala.

⁹ Pasa, Maaron ikaak ataam payou pa naghram uraat tiina izi sualen. Ve naghita naghaze uraat tiou ighurghur anona. Eemoghon ival tiina tizor-zoor saveeñ tiou paam. *2Kor 1:16; Kol 4:3; Syg 3:8*

Paulus ipaes padi pa Timoti ve Apolos

¹⁰ Ighaze aghita Timoti ilat peria tiam, yam aghami toman lolomim poia. Leso sawa to ineep toman gham, imatughez sob, ve lolo poia. Pasa, ye ighamgham uraat to Tiina toit Krisi, raraate inimale you. *1Kor 4:17*

¹¹ Tovenen tamtoghon eta mata izi pani malep. Ve sawa to ye ipamundigin laghoon toni muul, yam auuli, ve aghuri ila toman lolo poia, ve imuul inim tiou. Pasa, you nasasañani toman tonvetaz toit pida.

¹² Tonvetaz toit Apolos, sawa naol, you nasavsav ariana pani naghaze yesña tonvetaz toit pida tilat tighita gham. Eemoghon lolo pa ilat pa sawa tonene maau. Pale ighita soso eta, ghoron ilat ighita gham.

Paulus ipasob saveeñ toni

¹³ Matamim imosmoos ve ayoon ariana pa ghurla tiam. Amatughez malep. Apariaan tau-mim, ve ayoon tunja. *Mbo 31:24; Ep 6:10*

¹⁴ Ve sa ngar to aghaze aghami, yam aghami itaghon ngar to lolood pa tamtoghon. *1Kor 13:1+; 1Pe 4:8*

¹⁵⁻¹⁶ Yam awatag: Stepanas ve yes to tineep tomani ila ruum toni, timuun pa yam Akaia asob, ve tighur ila to Krisi muun. Ve yes tirei taudi pa

uraat to Tiina toit, ve timbesmbees kat pa tamtoghon toni. Ndiran tovene, toman tamtoghon tisob to tiuluul di ve tipul taudi kat pa uraat to Maaron, you naghaze napalot gham pa aneep ila sambadi, ve aloonj aliñadi. *1Kor 1:16; Pil 2:29; 1Tim 5:17; Hib 13:17*

¹⁷ Sawa to Stepanas toman Portunatus ve Akaikus tinim tivot tiou, yes tigham lolog poia kat. Onoon, yam ival irau anim maau. Eemoghon yes tigham naghomim ve tinim tivot, ve tiuul ghou pa mbep pida.

¹⁸ Tauto tipalot ghou ve tigham ateg izi, ini-male moghon moghon tighamgham payam. Tamtoghon tovene, yam irau apait di.

¹⁹ Lupuunj tisob to Krisi to tineep izi taan suruvu to Asia ne, tigham ndag poia todi ilat payam. Akwila yesuru Prisila toman yes to tiluplup di pa sunjuunj ila ruum todi ne, lolodi payam kat. Tovenen yes paam tigham ndag poia todi ilat payam ila Tiina toit iza. *Mbanj 18:2,18,26; Ro 16:3,5*

²⁰ Ve tonjetaz to Krisi to yeiña ninepneep ne paam, tisob tigham ndag poia todi ilat payam.

Yam asob tonjetaz to Krisi. Tovenen lolomim poia pa taumim ve awakisin nimamim. *Ro 16:16*

²¹ Nene you Paulus. Nambood ndag poia tiou tonene ilat payam pa taug nimag. *Kol 4:18; 2Tes 3:17*

²² Ighaze tamtoghon eta lolo pa Tiina toit maau, nene pale mbalmbali to Maaron iza toni.

O Tiina tiei, unum lak!*

²³ Poia to Tiina toit Yesu ineep toman gham.

* **16:22:** Paulus imbood saveenj waaro tonene ila yes Aramea aliñadi. Ighaze: 'Marana ta.'

²⁴ You lolog pa yam asob. Pasa, Yesu Krisi ilup
ghiit ve taneep ila toni.

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023

c7a45d99-91a2-564f-9c55-d2efc8be7fae